

清
史
稿

列傳六十七之七十五

第八十六册



郎坦

朋春

薩布素

瑪拉

郎坦瓜爾佳氏滿洲正白旗人內大臣吳拜子年十四授三等侍衛順治六年進二等從端重親王博洛討叛將姜瓖次渾源圍城賊渡濠來犯郎坦射其酋貫心殪遂敗賊師還進一等八年以吳拜附和內大臣洛什等獲罪並奪郎坦官尋復之康熙二年代吳拜管佐領遷護軍參領從定西將軍圖海討李自成餘黨李來亨等於茅麓山深入賊巢獲所置官十一四年襲一等精奇尼哈番十二年京師有張三道者設壇以邪教惑衆命郎坦與諸侍衛捕治十三年命行邊獲逋盜張飛骸等擢正白旗蒙古副都統調本旗滿洲順治中俄羅斯東部人犯黑龍江邊境時稱爲羅刹九年駐防寧古塔章京海塞遣捕牲翼長希福率兵與戰師敗績世祖命誅海塞鞭希福百仍駐寧古塔十一年固山額眞明安達里率師討之敗敵黑龍江羅刹未大創復侵入精奇里江諸處上命大

理寺卿明愛等諭令撤回遷延不卽去據雅克薩城於其旁耕種漁獵又過牛
滿恒滾侵擾索倫赫哲飛牙喀奇勒爾諸部二十一年秋遣郎坦及副都統朋
春等率兵往索倫比行諭曰羅刹犯我境恃雅克薩城爲巢穴歷年已久殺掠
不已爾等至達呼爾索倫遣人往諭以來捕鹿因詳視陸路遠近沿黑龍江行
圍逕薄雅克薩城勘其形勢度羅刹不敢出戰如出戰姑勿交鋒但率衆引退
朕別有區畫賜御用裘服弓矢以行及冬郎坦等還京師疏言羅刹久踞雅克
薩恃有木城若發兵三千與紅衣礮二十卽可攻取陸行自興安嶺以往林木
叢雜冬雪堅冰夏雨泥淖惟輕裝可行自雅克薩還至愛淖城於黑龍江順流
行船僅須半月逆流行船約須三月期倍於陸行於運糧饟軍器輜重爲便現
有大船四十小船二十六宜增造小船五十餘應用上諭曰郎坦等奏取攻取
羅刹甚易朕亦以爲然第兵非善事宜暫停攻取調烏拉寧古塔兵千五百人
并製造船艦發紅衣礮鳥槍教之演習於愛琿呼瑪爾二地建木城與之對壘
相機舉行所需軍糧取諸科爾沁十旗及錫伯烏拉官屯約得一萬二千石可

支三年愛琿城距索倫五宿可至其間設一驛俟我兵將至精奇里烏拉令索倫供牛羊如此則羅刹不得納我遁逃而彼之遁逃且絡繹來歸自不能久存矣尋擢郎坦前鋒統領二十二年命與黑龍江將軍薩布素會議駐兵額蘇哩事還奏額蘇哩七月卽經霜雪宜乘春和以寧古塔兵分爲三班更番戍守上以更番戍守非久長策不允二十三年甄別八旗管兵官罷郎坦前鋒統領以世職隨旗行走二十四年命都統朋春率師征羅刹郎坦以副都統銜隨征師薄雅克薩城羅刹酋額里克舍請降郎坦宣詔宥其罪引衆徙去毀木城是冬羅刹復來踞雅克薩築城二十五年命郎坦偕副都統班達爾沙携紅衣礮率籐牌兵百人往會將軍薩布素進兵上以郎坦諳悉地勢卽令參贊軍務六月薄其城鑿壕築壘賊出拒擊敗之斬額里克舍尋俄羅斯察罕汗上書請釋雅克薩圍上許之令郎坦撤軍還駐寧古塔尋擢正白旗蒙古都統二十八年上遣內大臣索額圖等與俄羅斯使人費耀多囉等會於尼布楚立約定界命郎坦與議乃毀所築城徙去二十九年古北口外盜起命郎坦偕侍衛赫濟爾音

等督兵捕勦盡殲之三十一年噶爾丹侵喀爾喀部擾及邊境授郎坦安北將軍率師駐大同疏請出邊駐喀喇穆倫偵寇詔暫駐歸化城尋擢領侍衛內大臣兼火器營總管列議政大臣三十二年授昭武將軍率師駐甘州三十三年移駐寧夏與甘肅提督孫思克分道偵寇上聞噶爾丹將逼圖拉命郎坦移兵禦勦以圖拉無警引還仍任領侍衛內大臣列議政如故三十四年往盛京巡閱邊隘還入塞疾劇遣太醫馳驛往視尋卒賜祭葬

朋春棟鄂氏滿洲正紅旗人何和禮四世孫何和禮子和碩圖進爵三等公子何爾本哲爾本蘇布遞襲至袞布以恩詔進一等朋春哲爾本子也順治九年襲封康熙十五年加太子太保授正紅旗蒙古副都統調本旗滿洲二十一年偕郎坦率兵至黑龍江覘羅刹形勢賜御用裘服弓矢與郎坦還奏上命寧古塔將軍巴海副都統薩布素建木城於黑龍江呼瑪爾調取所部兵一千五百人往駐焉又命尙書伊桑阿赴寧古塔督造戰船尋擢朋春正紅旗滿洲副都統二十四年詔選八旗及安置山東河南山西三省福建投誠籐牌兵付左都

督何祐率赴盛京命朋春統之進勦羅剎以副都統班達爾沙副都統銜瑪拉
鑾儀使建義侯林興珠護軍統領佟寶參贊軍務祐興珠皆鄭氏將來降者也
師既行上遣侍衛關保至黑龍江傳諭曰兵凶戰危朕以仁治天下素不嗜殺
以我兵馬精強器械堅利羅剎勢不能敵必獻地歸誠爾時勿殺一人俾還故
土宣朕柔遠至意五月師薄雅克薩城遣人諭降不從分水陸兵爲兩路列營
夾攻復移紅衣礮於前積薪城下示將焚焉羅剎頭目額里克舍詣軍前乞降
乃宥其罪釋還俘虜額里克舍引六百餘人徙去毀木城以歸附巴什里等四
十五戶及被掠索倫達呼爾百餘戶安插內地二十九年厄魯特與喀爾喀搆
釁命裕親王福全爲撫遠大將軍出邊勦噶爾丹以朋春與都統蘇努參贊軍
務蘇努率左翼朋春率右翼至烏闌布通噶爾丹依山列陳朋春所部爲泥淖
所阻蘇努督兵衝擊大破之噶爾丹僞乞和夜自大磧山遁走部議朋春坐奪
官上命寬之降級留任三十一年命解職赴西路軍前管隊三十五年復授正
紅旗蒙古都統旋以費揚古爲撫遠大將軍朋春仍參贊軍務出西路破噶爾

清史稿 卷一百一十五 三
丹於昭莫多師還以本隊護軍驍騎十八人戰死未收其骸下部議以師有功免罪仍錄戰績增注敕書三十八年因病解職尋卒子增壽改襲三等公

薩布素富察氏滿洲鑲黃旗人四世祖充順巴本以勇力聞世爲岳克通鄂城長太祖時其後人哈木都率所部來歸屯吉林遂家焉薩布素自領催授驍騎校遷協領康熙十六年聖祖遣內大臣覺羅武默訥等瞻禮長白山至吉林欲得識路者導引甯古塔將軍巴海令薩布素率兵二百携三月糧以從水陸行至長白山麓成禮而還事具武默訥傳十七年授薩布素甯古塔副都統羅刹據雅克薩二十一年詔率兵偕郎坦等勘視雅克薩城形勢並往視自額蘇哩至黑龍江及通甯古塔水陸道尋郎坦還奏羅刹可圖狀命建木城於黑龍江呼瑪爾兩地以巴海與薩布素統甯古塔兵千五百人往駐造船備礮二十二年疏言黑龍江呼爾瑪距雅克薩尙遠若駐兵兩處則勢分道阻且過雅克薩有尼布楚等城羅刹倘水陸運糧增兵救援更難爲計宜乘其積貯未備速行征勦俟造船畢度七月初旬能抵雅克薩即統兵直薄城下疏下王大臣議如

所請上不許尋命巴海留守吉林以薩布素偕甯古塔副都統瓦禮祜率兵駐額蘇哩額蘇哩在黑龍江呼瑪爾之間爲進攻雅克薩要地有田隴舊迹薩布素因移達呼爾防兵五百人赴其地耕種並請調甯古塔兵三千更番戍守上念兵丁更戍勞苦命在黑龍江建城備攻具設斥候計程置驛運糧積貯設將軍副都統領之擢薩布素爲黑龍江將軍招撫羅刹降人授以官職更令轉相招撫上命都統瓦山侍郎果不與薩布素議師期薩布素請以來年四月水陸并進攻雅薩克城不克則刈其田禾上謂攻羅刹當期必克倘謀事草率將益肆猖狂二十四年以朋春等統兵進攻薩布素會師克雅克薩城乃命薩布素移駐墨爾根建城防禦二十五年疏言羅刹復踞雅薩克請督修戰艦俟冰泮進勦上遣郎中滿不往調得實乃命薩布素暫停墨爾根兵丁遷移家口速修戰艦率甯古塔兵二千人往攻又命郎坦達爾沙會師抵雅克薩城城西瀕江薩布素令於城三面掘壕築壘爲長圍對江駐水師未冰時泊舟東西岸截尼布楚援兵冰時藏舟上流泚港內馬有疲羸者分發墨爾根黑龍江飼秣計持

久上因荷蘭貢使以書諭俄羅斯察罕汗答書請遣使畫界先釋雅克薩圍上允之命撤圍二十八年俄羅斯使臣費耀多囉等至尼布楚命內大臣索額圖等往會令發黑龍江兵千五百人爲衛尋議以大興安嶺及格爾必齊河爲界毀雅克薩城徙其人去二十九年薩布素入覲賜賚優渥命坐內大臣班尋命總管索倫等部貢物疏陳各部生計土俗採捕之事擬爲則例以上上悉允行三十一年奏建齊齊哈爾及白都訥城以科爾沁部獻進錫伯卦爾察達呼爾壯丁萬四千有奇分駐二城編佐領隸上三旗並設防守尉防禦等官噶爾丹入犯疏陳進兵事宜略言興安嶺北形勝地以索約爾濟山爲最已遣識路官兵自盛京吉林墨爾根審度至山遠近分置驛站其無水處掘井以待山之東北呼倫貝爾等處有警與臣駐軍地近即率墨爾根兵先進吉林盛京繼之山之西烏勒輝等處有警則盛京兵先進臣率部下及吉林兵繼之皆會於索約爾濟山上可其奏三十五年上親征噶爾丹自獨石口出中路大將軍費揚古自歸化城出西路命薩布素扼其東路督盛京甯古塔科爾沁兵自索約爾濟

山寇期進勦四月上次克魯倫河噶爾丹西竄爲費揚古所敗詔分薩布素所部兵五百人隸費揚古軍三十六年召至京師尋命回任初邊境有墨爾哲勒屯長累世輸貢康熙初屯長札努喀布克托請率衆內移寧古塔將軍巴海安輯於墨爾根編四十佐領號新滿洲薩布素奏於墨爾根兩翼立學設助教選新滿洲及錫伯索倫達呼爾每佐領下幼童一教習書義是爲黑龍江建學之始三十七年上幸吉林褒其勤勞予一等阿達哈哈番世職并御用冠服於衆前宣諭賜之尋疏言黑龍江屯堡因災荒積欠米石請俟年豐交倉上以薩布素曾奏革任總督蔡毓榮經理十二堡著有成效嗣因官堡荒棄請停止屯種將壯丁改歸驛站存貯倉米支放無餘致駐防兵饑匱乏責令回奏薩布素具疏引罪請以齊齊哈爾墨爾根駐防兵每年輪派五百人往錫伯等處耕種官田穫穀運齊齊哈爾交倉詔侍郎滿丕等往按以薩布素將荒廢地妄報成效並浮支穀石應斬命罷任奪世職在佐領上行走尋授散秩大臣三十九年卒乾隆間敕修盛京通志列名宦且稱薩布素諳練明敏得軍民心其平羅刹及

黑龍江興學有文武幹濟才云

瑪拉那喇氏滿洲鑲白旗人尙書尼堪從子尼堪卒無子瑪拉與叔阿穆爾圖阿錫圖及弟兆資分襲尼堪世職瑪拉襲三等阿達哈哈番初任理藩院筆帖式順治五年英親王阿濟格征叛將姜瓖圍大同令瑪拉調蒙古兵以從累遷理藩院副理事官康熙十四年察哈爾布爾尼叛聖祖命信郡王鄂札帥師討之瑪拉自陳久任理藩院習知蒙古狀願赴軍前效力遂命與員外郎色梭赴科爾沁諸部調選兵馬協剿師還擢通政使遷禮部侍郎十六年擢工部尙書偕內大臣喀岱往科爾沁諸外藩宣諭禁令瑪拉初受任上誠以工部積弊宜殫心釐剔十九年坐不能清積弊議降五秩詔從寬留任復以饗殿器用修造疏忽奪尙書仍留世職二十二年上以俄羅斯數犯邊擾及索倫飛牙喀諸部命集兵黑龍江將進討遣瑪拉往索倫儲軍實尋疏言索倫總管博克所獲俄羅斯人及軍前招降者皆迫於軍威不宜久留索倫應移之內地詔允行復言雅克薩尼布楚二城久爲羅刹所據臣密詞雅克薩惟耕種自給尼布楚歲捕

貂與喀爾喀貿易資養贍請飭喀爾喀車臣汗禁所部與尼布楚貿易並飭黑龍江將軍水陸並進示將攻取雅克薩因刈其田禾則俄羅斯將不戰自困上然之即以瑪拉所奏檄示喀爾喀二十四年遣都統朋春等帥師往黑龍江議進兵授瑪拉副都統銜參贊軍務遣蒙古兵三十調雅克薩城生擒羅刹七人得城中設備及乞援各部狀是年夏朋春等攻羅刹克之逐其人瑪拉在事有功二十五年黑龍江佐領鄂色以耕牛多斃農器損壞奏請儲備命瑪拉往黑龍江督理農務諭曰農事關軍饒令嚴督合力播種值歲豐收穫甚稔二十七年授護軍統領二十九年噶爾丹侵掠喀爾喀命瑪拉偕都統額赫納前鋒統領碩爾等率兵往討之賜內廐馬以行未幾噶爾丹掠烏珠穆沁命裕親王福全等分統大軍出塞擊之噶爾丹敗遁師旋三十年復來犯至阿爾哈賚無所掠而遁時土謝圖汗車臣汗率所部來歸上幸塞外撫輯瑪拉扈從旋命偕都統瓦岱等率兵赴圖拉偵噶爾丹抵克魯倫河聞其遠竄乃還授西安將軍三十二年準噶爾和碩特部吉巴圖爾額爾克濟農來降上以其人未可信命瑪

拉徙入內地母令復逸瑪拉疏言巴圖爾額爾克濟農率所屬二千餘口窮乏
來歸揆其情狀當不復逸遂遣官護送并其子台吉雲木春來朝優賚遣之未
幾瑪拉卒於官賜祭葬諡敏恪

論曰俄羅斯之爲羅刹譯言緩急異耳非必東部別有是名也初遣兵誦敵郎
坦主其事取雅克薩城朋春薩希素迭爲將而郎坦與瑪拉實佐之尼布楚盟
定開市庫倫是爲我國與他國定約互市之始用兵當期必克我苟草率彼益
猖狂聖祖諭薩布素數言得馭夷之要矣

費揚古

滿丕素丹

碩岱

馬斯喀

佟國綱

邁圖

格斯泰

阿南達

子阿喇納

吉勒塔布

殷化行

潘育龍

孫紹周之善

額倫特

康泰泰弟海

費揚古棟鄂氏滿洲正白旗人內大臣三等伯鄂碩子狀貌魁異年十四襲爵康熙十三年從安親王岳樂率兵徇江西討吳三桂三桂將黃乃忠糾衆萬餘自長沙犯袁州費揚古與副都統沃赫總兵趙應奎擊敗之克萬載十五年擊走夏國相於萍鄉進圍長沙累戰皆捷十八年復敗吳國貴於武岡師還擢領侍衛內大臣列議政大臣噶爾丹劫掠喀爾喀遣使諭罷兵不從數擾邊境二十九年授裕親王福全爲撫遠大將軍率師討之命費揚古往科爾沁徵兵參贊軍事秋擊敗噶爾丹於烏闌布通三十二年歸化城增戍兵以費揚古爲安北將軍駐焉三十三年噶爾丹遣使至請入貢費揚古發兵迎護偵其衆男婦

千五百有奇留之歸化城疏聞上察噶爾丹意叵測陽爲修好潛遣入內地窺探命侍郎滿丕諭責其使遣之還七月聞噶爾丹將窺圖拉詔費揚古偕右衛將軍希福率軍往禦希福請益兵上責其疑沮令勿偕往尋以圖拉無警慮噶爾丹將趨歸化城詔費揚古旋師三十四年噶爾丹至哈密費揚古往禦乃自圖拉河西竄尋授右衛將軍仍兼攝歸化城將軍事疏言聞噶爾丹據巴顏烏闌距歸化城約二千里宜集兵運糧於來年二月進勦詔授費揚古撫遠大將軍以都統伊勒慎護軍統領宗室費揚古瓦爾達副都統碩岱將軍舒恕參贊軍事尋召入覲授以方略三十五年二月詔親征三路出師以黑龍江將軍薩布素出東路費揚古出西路振武將軍孫思克西安將軍博霽自陝西出鎮彝並進上親督諸軍自獨石口出中路上與費揚古期四月會師圖拉費揚古師自翁金口進次烏闌厄爾幾再進次察罕河朔與孫思克師會而上已循克魯倫河深入五月費揚古師至圖拉疏言西路有草之地爲賊所焚我軍每迂道秣馬又遇雨糧運遲滯師行七十餘日人馬疲困乞上緩軍以待上進次西巴

爾台再進次額爾德尼拖洛海噶爾丹屯克魯倫河聞上親督師至升孟納爾山遙望見御營大驚盡棄其廬帳器械遁去上命馬思喀爲平北大將軍逐噶爾丹並密諭費揚古要擊親督大軍躡其後次中拖陵費揚古偵知噶爾丹走特勒爾濟遣前鋒統領碩岱副都統阿南達阿廸等率兵先往挑戰且戰且却誘至昭莫多昭莫多者蒙古語大林也在肯特嶺之南土臘河之北費揚古分兵三隊東則京城西安諸軍及察哈爾蒙古兵屯山上西則右衛大同諸軍及喀爾喀蒙古兵沿河列陳孫思克率綠旗兵居其中並遵上方略令官兵皆步戰俟敵卻乃上馬衝擊噶爾丹衆猶有萬餘人冒死鏖鬪自未至酉戰甚力費揚古遙望噶爾丹後陣不動知爲婦女駝畜所在麾精騎襲其輜重敵大亂乘夜逐北三十餘里至特勒爾濟口斬級三千餘俘數百人獲駝馬牛羊廬帳器械無算噶爾丹妻阿奴喀屯素悍能戰亦殪於陳噶爾丹引數騎遠竄費揚古令阿南達詣御營奏捷上乃班師令費揚古駐守科圖尋命移駐喀爾喀郡王善巴游牧地訶噶爾丹所往甫至噶爾丹潛使台吉丹濟拉率千五百人入掠

喀爾喀牲畜糗糧遣副都統祖良璧禦却之追至翁金河丹濟拉敗遁尋以馬
疲請移軍駐喀喇穆倫會噶爾丹使其宰桑格壘沽英等來請納款上再幸塞
外駐蹕東斯垓召費揚古至行在入對上褒其功奏曰軍中機務皆遵皇上指
授並未有所效力况西路糧匱馬乏不能前進及聞駕至克魯倫官兵無不奮
發不俟督責力戰破敵奈臣庸劣皇上窮追困蹙之寇臣不能生擒以獻實臣
罪也上曰噶爾丹窮蹙朕不忍悉加誅戮不如撫而活之對曰此天地好生之
仁非臣等所能測也賜御佩橐韃弓矢命還軍二十六年春正月阿南達自肅
州奏哈密回人擒獻噶爾丹子塞卜騰巴爾珠爾等上以其疏錄示費揚古並
賜胙肉鹿尾關東魚諭曰時當上元令節衆蒙古及投誠厄魯特等齊集暢春
園適阿南達疏至衆皆喜悅爾獨居邊塞不得在朕左右故以疏示並問爾無
恙卽如與爾相見也二月上復親征自榆林出塞詔費揚古密籌進勦費揚古
以去歲未生擒噶爾丹請解大將軍任上不允令便宜調遣軍馬費揚古進次
薩奇爾巴爾哈孫丹濟拉使來言噶爾丹至阿察阿穆塔台飲藥自殺欲携其

尸及其女鍾齊海率二百戶來歸費揚古以聞上乃班師令費揚古駐察罕諾爾以待六月丹濟拉至哈密費揚古有疾詔昭武將軍馬思喀代領其軍還京師仍領侍衛內大臣進一等公仍以未生擒噶爾丹疏辭不允因諭曰昔朕欲親征噶爾丹衆皆諫止惟費揚古與朕意合遂統兵西進道路遼遠兼乏水草乃全無顧慮直抵昭莫多俾奸狡積寇挫衄大敗累年統兵諸將未有能過之者又曰屢出征知爲將甚難費揚古相機調遣緩急得宜是以濟事四十年從幸索約勒濟中途疾作上駐蹕一日親臨視疾賜御帳蟒緞鞍馬帑銀五千遣大臣護之還京師尋卒賜祭葬諡襄壯以子辰泰襲一等侯兼拖沙喇哈番費揚古樸直有遠慮昭莫多破賊費揚古令幕府具疏減斬馘之數備言師行迷道絕糧皆臣失算賴聖主威福徼幸成功非意料所及幕府或咎其失體費揚古曰今天子親御六師如見策勳易啟窮兵黷武之漸非國家福也及還京師上嘗命大臣校射費揚古以臂痛辭出語人云我嘗爲大將軍一矢不中爲外藩笑損國家威重故不敢與角耳滿丕伊爾根覺羅氏滿洲正藍旗人世管佐

領自贊禮郎累遷御史兼管佐領以事奪官從都統郎坦赴尼布楚與俄羅斯使臣議界還授理藩院郎中二十九年偕員外郎鄂齊爾壹敕宣示噶爾丹時大將軍裕親王福全統師往烏闌布通上親臨邊指授方略滿丕以噶爾丹奏書至因言賊距大軍僅百里請往擊之上許之遂赴烏闌布通督火器營擊敗噶爾丹得頭等功牌累擢理藩院侍郎三十三年費揚古進軍圖拉尙書阿喇尼率蒙古兵爲前哨命滿丕協同經理驛站三十四年命往歸化城協理軍務三十五年上親征命將兩藍旗兵赴費揚古軍自翁金趨圖拉破賊昭莫多奉詔還歸化城察視凱旋官兵行糧及撫輯降人旋仍赴費揚古軍移駐喀爾喀游牧界外塔拉布拉克偵防噶爾丹收降其部人札木素等未幾噶爾丹竄死召還京列議政大臣予拖沙喇哈番世職三十九年命往四川勘撫番蠻同提督唐希順攻復打箭鑪於是雅隴江濱瞻對喇袞革布什咱綽斯甲布諸土目各率所屬戶口投誠奏請授五品安撫司其副爲六品土百戶從之擢正藍旗蒙古都統以疾乞罷尋卒碩岱喜塔喇氏滿洲正白旗人先世居片雅滿山有

昂郭都哩巴顏者歸太祖碩岱其五世孫也初授二侍衛兼甲喇額眞世祖幸南苑碩岱與一等伯巴什泰及蒙古侍衛索尼並從索尼猝拔刀殺巴什泰碩岱即舉所執長槍擊索尼立仆禽之置諸法上嘉其勇敢予世職拜他喇布勒哈番兼拖沙喇哈番授巴牙喇甲喇章京從將軍卓布泰南征渡盤江擊敗李成蛟復進攻李定國度磨盤山遇伏力戰破之又從將軍濟席哈討定山東土寇于七康熙初擢前鋒統領吳三桂反命率兵先諸軍發駐守荊州尋命參贊順承郡王勒爾錦軍務未幾罷參贊從將軍穆占等攻長沙三桂將馬寶胡國柱等犯永興碩岱往援失利棄營入城穆占劾之還京師罷官奪世職二十九年起爲正白旗滿洲副都統從定北將軍瓦岱征噶爾丹至克魯倫河偵賊遠遁遂還尋偕都統噶爾瑪率兵駐大同三十五年大將軍費揚古出師西路命碩岱署前鋒統領率大同護軍二百八十人爲前鋒噶爾丹遁往西路命費揚古要擊偵賊至特勒爾濟口令碩岱率前鋒挑戰誘至昭莫多合圍奮擊斬獲無算師還擢內大臣復世職進三等阿達哈哈番五十一年卒子海綬於雍

正七年以護軍校隨大將軍傅爾丹征準噶爾擊賊和通呼爾哈諾爾陣沒議
卹予世職拖沙喇哈番素丹富察氏滿洲正黃旗人費雅思哈子襲世職授護
軍參領從裕親王擊噶爾丹戰烏蘭布通中箭傷擢護軍統領命帥師駐大同
三十五年上親征噶爾丹命素丹發兵與費揚古刻期並進尋召赴行在統前
鋒兵爲導上次克魯倫河素丹請俟費揚古軍至夾擊師還賜內廐馬改授前
鋒統領以疾解任雍正初命大將軍年羹堯征青海起素丹參贊軍務西甯郭
隆寺喇嘛助亂素丹與提督岳鍾琪討平之授正黃旗蒙古都統署固原提督
尋改正紅旗滿洲都統列議政大臣仍駐守陝西七年師征噶準爾命素丹將
西安滿洲兵出涼州卒於軍賜祭葬諡勤僖

馬斯喀富察氏滿洲鑲黃旗人米思翰長子初授侍衛兼佐領康熙二十七年
自護軍參領授武備院卿二十八年遷鑲黃旗滿洲副都統尋擢內務府總管
領侍衛內大臣兼管火器營三十五年上親征噶爾丹馬斯喀率鑲黃旗烏槍
兵以從先期命與諸大臣議定出征營陳隊伍序次上駐郭和蘇臺命閱留牧

馬羣議分馬羣爲七擇水草佳處爲牧地上進駐西巴爾台距克魯倫河已近而費揚古軍未至圖拉諭王大臣集行營議信郡王鄂札請駐師以待馬斯喀與內大臣蘇勒達明珠請進薄敵營上從之復進次克魯倫河噶爾丹望見御營嚴整遂驚遁上親統師逐之至拖諾山授馬斯喀平北大將軍率師進至巴顏烏闌噶爾丹敗於昭莫多北走所部丹巴哈什哈等詣馬斯喀軍降馬斯喀與費揚古師會收集降人遣兵衛送至張家口外乃還師列議政大臣復從上出塞率師駐大同三十六年春授昭武將軍移師駐甯夏都統巴渾德齊世將軍薩布素都統兼前鋒統領碩鼎護軍統領嵩祝總兵王化行並參贊軍務尋命與費揚古會師馬斯喀以將軍參贊費揚古軍務初伊拉古克三胡圖克圖盜馬歸噶爾丹及噶爾丹死復投策妄阿拉布坦費揚古令馬斯喀率師追之次摩該圖不能及引師還上遣侍郎常綬等諭策妄阿拉布坦得伊拉古克三胡圖克圖以歸誅之馬斯喀坐追勦遲緩當奪官上命留內務府總管及佐領四十一年授鑲白旗蒙古都統四十三年卒賜白金千遣內大臣奠茶酒發引

命皇子往送賜祭葬諡襄貞

佟國綱佟佳氏滿洲鑲黃旗人佟圖賴子初隸漢軍領牛彙額眞授侍衛康熙元年襲三等精奇尼哈番授內大臣十四年察哈爾布爾尼爲亂授安北將軍率師駐宣府布爾尼亂定引還十六年推孝康章皇后外家恩贈佟圖賴一等公仍以國綱襲二十年授鑲黃旗漢軍都統疏陳世系請改入滿洲下部議許以本支改入滿洲二十八年命與內大臣索額圖等如尼布楚與俄羅斯使臣費耀多羅等議立約定界二十九年大將軍裕親王福全率師討噶爾丹以國綱參贊軍務八月己未朔師次烏蘭布通噶爾丹屯林中臥駝於前而兵伏其後國綱奮勇督兵進擊中烏槍沒於陳喪還命皇子迎奠將葬上欲親臨國綱弟國維及諸大臣力阻乃命諸皇子及諸大臣皆會賜祭四壇諡忠勇上以翰林院撰進碑文不當意乃自爲製文有曰爾以肺腑之親心膂之寄乃義存奮激甘蹈艱危人盡如斯寇奚足殄惟忠生勇爾實兼之雍正初加贈太傅邁圖亦佟佳氏滿洲正白旗人父烏進國初自哈達來歸邁圖初授侍衛從信郡王

多尼下貴州破明桂王將李成蛟於涼水井李定國於雙河口於魯噶從康親王傑書徇福建討耿精忠授行營總兵戰黃巖克建陽從將軍拉哈達破鄭錦將何祐於太平山復興化拔泉州從將軍賚塔破錦將劉國軒吳淑於蜈蚣山復長泰皆有功康熙二十五年授正白旗蒙古副都統兼佐領尋署前鋒統領從征厄魯特戰烏蘭布通陳沒諡忠毅進世職三等阿達哈哈番格斯泰瓜爾佳氏滿洲鑲白旗人先世居瓦爾喀父赫勒歸太祖從伐明攻獻縣先登入關西討李白成破潼關下江南徇浙江破明兵嘉興城下以牛录額眞授拜他喇布勒哈番格斯泰初爲睿親王護衛從大將軍伊爾德克舟山從都統瑪奇下雲南破賊石門坎黃草壩克雲南會城皆有功累擢前鋒參領兼管佐領從國綱戰烏蘭布通國綱戰沒格斯泰直入賊營左右衝擊出而復入者再乘勝追賊至河岸阻於淖賊麕集格斯泰力戰與邁圖等皆歿於陳師將發上賜之馬格斯泰請自選得白鼻或言白鼻古所忌格斯泰曰效命疆場吾夙願也何忌師還裕親王奏方戰時親見一將乘白鼻馬三入敵陳衆皆識爲格斯泰也賜

清史稿
六
祭葬視副都統予世職拜他喇布勒哈番

阿南達烏彌氏蒙古正黃旗人祖巴賴都爾莽柰初事察哈爾林丹汗林丹汗
敗走率所部二百三十餘戶保哈屯河逾歲歸太宗授一等梅勒章京從攻甯
遠敗明兵復從攻錦州戰死贈三等昂邦章京父哈岱年十七從父攻甯遠敵
矢殪父馬且踣哈岱不遑甲馳入陳下馬掖其父超乘步從擊敵與俱還太宗
嘉其勇厚賚之父死襲世職屢從伐明敗明兵入關定江南徇浙江擊騰機思
討姜瓖取舟山皆在行間康熙間授內大臣討吳三桂命與侍衛阿喇尼徵喀
喇沁翁牛特蘇尼特諸部兵分駐大同河南兗州備調發卒諡勤壯阿南達哈
岱次子也以一等侍衛兼佐領康熙八年鰲拜敗坐黨附罪斬聖祖特寬之二
十七年噶爾丹侵掠喀爾喀諸部命偕喇嘛商南多爾濟齎敕諭罷兵噶爾丹
遣使入朝而侵掠如故二十九年命往會喀爾喀諸部兵討噶爾丹以尙書阿
喇尼都統額赫納等先後率師出塞阿南達還奏言噶爾丹爲托多額爾德尼
擊敗偵卒還報有二人共一騎者有削木爲兵者狀至窮蹙請發兵討之上命

選察哈爾兵六百率以赴圖拉益額赫訥軍尋阿喇尼請移西路軍會勦阿南
達率兵渡瀚海會大將軍裕親王福全敗賊於烏闌布通三十一年命赴甯夏
招和碩特部台吉巴圖爾額爾克濟農來降擢正黃旗蒙古都統三十二年間
噶爾丹將取糧哈密授郎坦爲昭武將軍召阿南達還二十五年上親征噶爾
命阿南達如喀爾喀諸部求習塞外途逕者二十人爲導上次克魯倫河噶爾
丹將走還特勒爾濟阿南達方從費揚古自圖拉向昭莫多費揚古令阿南達
等先擊噶爾丹僞敗以致敵至昭莫多縱擊敗敵事具費揚古傳阿南達赴行
在奏捷上召詢戰狀對曰噶爾丹聞上親征惶駭竄走不虞我兵絕其歸路突
然交戰擒斬過半死傷枕藉屬下人多怨懟降者甚衆噶爾丹深以爲悔費揚
古慮涉矜張疏報捷特約略言之上乃班師命阿南達駐守肅州尋移軍邊境
誦噶爾丹蹤跡阿南達遣兵分駐昆都倫濟內諸處復與提督李林隆移礮
赴布隆吉爾度要隘留軍策應乃還肅州上以其章示議政諸臣獎阿南達防
邊能稱職也噶爾丹自昭莫多敗後部衆多離散噶爾丹多爾濟者其妻弟也

陰持兩端阿南達至布隆吉爾獲其邏卒縱歸招之降遂遣使通款阿南達因其使檄哈密回部噶爾丹且至當禽獻即傳語噶爾丹多爾濟噶爾丹至哈密哈密且禽獻當爲哈密助未幾噶爾丹遣族子顧孟多爾濟等與達賴喇嘛青海諸台吉通聲聞阿南達復至布隆吉爾偵知之率兵追及於素爾河擒其使人以其書十四函馳奏二十六年哈密回部擒噶爾丹子色卜騰巴爾珠爾及其從者徽特和碩齊等送阿南達繼又獲厄魯特土克齊喀什喀土克齊實戕我使臣馬迪至是始就擒先後檻送京師尋復疏言厄魯特晉巴徹爾貝來降詢知噶爾丹窮促狀是歲上復親征命與林隆率甘州兵二千出布隆吉爾次塔爾河聞噶爾丹已死所部台吉丹濟拉將竄巴里坤依噶爾丹從子策妄阿喇布坦因往追之未及上命還駐布隆吉爾丹濟拉詣哈密乞降詔南達護使謁上行在敘昭莫多功予拖沙喇哈番世職尋奉命率兵駐西甯四十年卒賜祭葬雍正二年追諡恪敏阿喇納阿南達長子少襲其祖哈岱世職授三等侍衛累進散秩大臣策妄阿喇布坦繼噶爾丹爲寇侵哈密五十四年上命尙書

富寧安視師屯巴爾庫爾五十五年授阿喇納參贊大臣選八旗察哈爾勁卒及嘗從阿南達出塞者得四百人率之以行五十六年授富寧安靖逆大將軍令阿喇納將一千三百人自烏闌烏蘇深入烏魯木齊至通俄巴錫搜山俘一百數十人收駝馬牛羊躡其稼乃還五十九年師入西藏富寧安復令率四千人自吐魯番出邊至齊克塔木破賊敵壘進至皮禪回民三百餘以城降師遂會富寧安於烏闌烏蘇引還六十年上命率師進取吐魯番因留駐其地策妄阿喇布坦來犯阿喇納行與遇令分兵爲三突入陳策妄阿喇布坦敗入林中棄馬步戰我師發槍擊殺準噶爾兵百餘乃敗走逐北數十里俘獲甚衆授協理將軍築城屯墾爲持久計阿喇納久居邊塞悉敵情疏請進兵伊犁下議政大臣議以賊已遠竄暫緩進兵雍正元年擢鑲紅旗蒙古副都統師征青海命率兵二千駐布隆吉爾賊酋阿喇布坦蘇巴泰來襲遣師追至推默爾大敗之未幾卒於軍遺疏爲父請諡上特許之賜白金千遣官護喪歸諡僖恪加拜他勒布喇哈番以其子伍彌泰兼襲合爲三等伯乾隆間定封號曰誠毅伍彌泰

自有傳

吉勒塔布李佳氏滿洲正紅旗人覺善第三子初授侍衛兼前鋒參領康熙十一年授正紅旗蒙古副都統十三年耿精忠叛命偕副都統拉哈率師駐江甯尋令援浙江從將軍貝子傅喇塔攻嵎縣與精忠將曾養性等戰於黃瑞山督兵乘夜分兩翼衝擊又遣兵循山麓疾上以鳥槍旁擊之養性敗潰克仙居十四年養性與叛將祖宏勳犯台州吉勒塔布與都統沃申赴援戰於平山嶺殪賊四千餘奪梁蓬隘道遇賊伏盡殲之直趨黃巖副都統穆赫林督兵夾擊養性夜走溫州克黃巖復戰於上塘嶺攻溫州久未下十五年養性復以四萬餘人來犯吉勒塔布遣兵分道逆擊進勦處州過三角嶺循江度師養性以百餘丹屯江上陸兵屯得勝山下據險拒我師吉勒塔布與總兵陳世凱分道拔賊壘又以礮擊賊舟沈諸江師次溫溪渡口擊敗精忠將馬成龍等斬千餘級遂與康親王師會衢州偕都統賚塔等擊精忠將馬九玉戰於大溪灘吉勒塔布督兵踰三濠進焚木城克江山九玉敗遁遂度仙霞嶺進克浦城建陽諸縣從

康親王進次福州精忠降十六年擊鄭錦同安十八年與錦將劉國軒戰於下坑於歐溪頭於郭坑皆勝斬二千餘級收海澄與沃申駐師漳州二十一年師還累擢護軍統領正紅旗蒙古都統二十七年授兵部尙書列議政大臣噶爾丹侵喀爾喀上命吉勒塔布與都統巴海等徵科爾沁諸部兵備邊尋命往蘇尼特度水草佳處爲喀爾喀牧地二十九年命與尙書阿喇尼出塞自歸化至圖拉置臺站率師會喀爾喀諸部自洮瀨河進攻噶爾丹噶爾丹掠烏珠穆秦部至烏勒輝河我師與遇分兵乘夜挑戰喀爾喀兵違節度亂陳戰失利吉勒塔布當奪官命留佐領率兵駐呼魯固爾河旋命與內大臣阿密達同駐克勒待裕親王師至分三隊以進吉勒塔布爲第一隊大敗噶爾丹於烏蘭布通三十年詔移喀爾喀土謝圖車臣兩部歸附人牧近邊上出塞撫綏令吉勒塔布與尙書馬齊班第等先期集歸附人於上都河額爾屯河以待上慮巴圖爾額爾克濟農掠喀爾喀命吉勒塔布督喀爾喀諸部兵爲備三十一年巴圖爾額爾克濟農降罷兵歸三十五年擢都統三十六年卒賜祭葬

殷化行字熙如陝西咸陽人初以王姓成康熙九年武進士十三年從經略莫洛討吳三桂授守備會王輔臣叛莫洛遇害化行被脅羈秦州稱病不爲賊用逾年自拔歸總督哈占奏復原職補火器營守備從振武將軍佛尼勒戰牛頭山攻克上下嶺三桂將王屏藩據漢中以二萬人犯寶雞大將軍圖海檄化行赴援破敵解西山堡圍復自大泥峪取兩河關復興安州城十九年佛尼勒援永甯化行爲前鋒敗敵托川擊走三桂將胡國柱於安甯橋調援敘州與西甯總兵李芳述守城賊分三路來攻擊卻之圖海哈占合疏陳化行奮戰狀特擢漢中城守營副將二十年逐國柱迭戰安邊敘馬連峯石盤關諸處屢克要隘復馬湖府城二十二年追議輔臣叛時被脅坐奪官哈占以化行未爲輔臣用從征有勞奏復原職授直隸三屯營副將二十三年敘功加一等授都司僉書兼管副將事二十五年上幸畿東化行扈從行圍賜上用佩刀二十六年擢福建臺灣總兵賜貂裘白金時議城臺灣化行言地皆浮沙難以鞏固令部下人致樹一植爲城數日而成諸部亦各植木城繕治甲兵防禦以固三十年移襄

陽陝西旱米價騰貴民多流移詔發襄陽米二萬石水運至商州改陸運至西
安命內閣學士德珠與化行及總督丁思孔往督水陸輓運並護流民還里三
十二年移登州復移甯夏三十五上年親征噶爾丹三路出師發陝西兵當西
路遣刑部尙書圖納會將軍督撫及河西提鎮議進兵事化行陳方略詔報可
時綠旗兵統於振武將軍孫思克率涼州總兵董大成肅州總兵潘育龍及化
行自甯夏出塞會大將軍費揚古進勦化行領所部兵三千至翁金河簡精卒
前進遇敵昭莫多山崖峻削其南漸陔有小山橫互化行急據其巔麾軍士畢
登敵猝至山腹發砲擊之噶爾丹率衆死鬪鋒甚銳化行使告費揚古曰賊陳
堅宜遣一軍衝其脅賊婦女輜重俱在後陳刼之必亂費揚古從之化行望山
下兩軍將薄陳鼓行而下敵披靡死傷枕藉噶爾丹敗遁詔班師是役化行功
最三十六年疏請率兵二千至郭多里巴爾哈孫偵禽噶爾丹會上西巡將幸
甯夏化行迎謁奏請行圍花馬池觀軍容上曰師行賴馬力今噶爾丹未滅甯
夏兵至花馬池往來七八日馬必疲獵細事耳罷獵而休馬以獵噶爾丹何如

乃令化行率所部兵五百人從昭武將軍馬思喀復出塞尋命化行參贊軍務諭謂綠旗總兵官未有授參贊者並賜孔雀翎師次郭多里巴爾哈孫會大將軍費揚古兵進至洪郭羅阿濟爾罕噶爾丹死詔班師化行還甯夏三十七年請復本姓敘昭莫多功予拖沙喇哈番世職擢廣東提督三十九年瓊州營游擊詹伯豸等擾黎人黎人王鎮邦爲亂以化行約束不嚴降級留任四十年連陽猺爲亂里入峒油嶺二排尤凶橫化行率總兵劉虎駐師里入峒遣副將林芳入排使執爲亂者以獻猺人戕芳及所從兵役上命尙書嵩祝爲將軍令化行及廣西湖南提督各發兵討之四十一年夏會師連州分扼要隘猺人懼縛獻爲亂者李貴鄧二等置諸法餘悉就撫尋追按芳被戕化行虎不能救虎奪官化行休致四十二年上幸西安化行迎謁授其子純四等侍衛四十九年卒潘育龍字飛天甘肅靖遠人初入伍從征李來亨等於茅麓山有功康熙十四年王輔臣叛育龍從副將偏圖攻三水淳化復從揚威將軍阿密達戰涇州甯夏道梗大將軍董額使育龍赴提督陳福軍自紅河川白馬城諸要隘轉戰七

晝夜達甯夏駐靈州招撫散卒總督哈占調援山陽敗賊於甘溝口十五年從撫遠大將軍圖海奪平涼城北虎山墩累擢守備十七年吳三桂兵犯牛頭山香泉育龍從總兵王好問等出間道擊破之十八年克梁河關斬三桂將李景才景文略等薄興安三桂將謝泗王永世以城降敘功擢都司僉書叛將譚宏據川東育龍從哈占進勦復大竹渠縣遷游擊二十七年以總督噶思泰薦擢甘州副將學士達瑚等自西藏使旋至嘉峪關外爲西海阿奇羅卜藏所掠將軍孫思克使育龍偕游擊韓成等搗其巢斬級四百有奇阿奇羅卜藏遁事聞詔嘉獎三十年赴甯夏防勦噶爾丹時改肅州協爲鎮卽以育龍爲總兵三十二年降番罕篤與羅卜藏額林臣奇齊克等復叛育龍追至庫列圖嶺斬四十餘級獲百二十人三十四年噶爾丹屬回塔什蘭和卓等五百餘人入犯度三岔河育龍擊禽之三十五年從征噶爾丹遇賊昭莫多飛礮中育龍右頤益力戰賊敗遁師還召至京師上撫視其創命御醫診視賜衣一襲移鎮天津敘功予拖沙喇哈番世職四十年擢陝西提督賜孔雀翎四十二年上西巡育龍迎

謁山西賜御書榜駐蹕渭南閱固原將卒校射顧大學士馬齊等曰朕巡歷諸省綠旗無如潘育龍兵者命加秩尋特授鎮綏將軍領提督如故四十九年上幸五臺育龍迎謁賞賚優渥親製詩章寵之時有陳四等率妻子游行鬻技走馬上竿躡索算卦俗名曰卦子人既衆遂爲盜育龍捕得五百九十餘人有司讞鞠因疏請飭各省督撫責所屬鄉村堡寨遇令改業編戶爲民給荒地開墾馬騾牲畜變爲牛種載入賦役全書下部議行尋以病累疏乞休詔輒慰留五十八年卒贈太子少保賜祭葬諡襄勇孫紹周改籍陝西西安襲世職授二等侍衛累遷廣西慶遠協副將雍正初總督鄂爾泰奏開古州都江河道以定且來牛二寨苗梗路檄紹周統廣西兵赴古州諸葛營與貴州副將趙文英會勦盡平賊寨擢雲南提督賜花翎調古北口以病解任乾隆十八年卒高宗追念育龍軍功特予恩騎尉世職以紹周子忱嗣之善育龍從孫仍籍甘肅靖遠初從育龍征噶爾丹昭莫多之役力戰中槍詔來京師醫治四十二年上幸西安之善迎謁臨潼授藍翎侍衛賜孔雀翎補肅州鎮標游擊策妄阿喇布坦以二

千人侵哈密之善率兵二百擊敗之上嘉其勇超擢陝西潼關副將從靖逆將軍富寧安擊準噶爾於烏魯木齊多俘獲雍正初青海台吉羅卜藏丹津叛侵布隆吉爾與參將孫繼宗引兵夾擊斬獲無算擢四川北總兵移鎮陝西西安之善以邊外遼闊當設卡路杜窺伺乃遣兵於沙州西路伊遜察罕齊老圖及察罕烏蘇諾爾分路偵禦並以住牧熟夷數百戶分置諸要隘調敵情督修西安城及沙州五堡以二千四百戶屯田沙州籌牛種建房舍疏聞上深嘉之命署固原提督諭曰此軍乃汝叔祖潘育龍所整理爲天下第一營伍流風餘韻至今可觀若不能企及何顏以對朕耶尋以目眚解任十一年卒

額倫特科奇哩氏滿洲鑲紅旗人佛尼埒子也佛尼埒卒官家貧不能還京四川總督哈占請留額倫特西安效力部議不許上特允之康熙二十三年授西安駐防佐領三十年從將軍尼雅翰逐厄魯特巴圖爾額爾克濟農又從將軍郎坦赴克錫圖額皆有勞三十五年上親征噶爾丹從大將軍費揚古出西路破敵昭莫多以功授世職拖沙拉哈番擢協領四十三年上幸西安閱武設宴

特命額倫特近御座親賜之飲諭曰爾父宣力行間爾亦入伍能效力故賜爾
飲尋遷西安副都統調荊州副都統四十九年擢湖廣提督五十二年授湖廣
總督尋命履勘湖南諸州縣荒壤得四萬六千餘頃疏請聽民開墾六年後以
下則起科五十四年命往按太原知府趙鳳詔貪墨狀論罪如律厄魯特策妄
阿拉布坦犯哈密上遣尙書富寧安等率師討之五十五年命額倫特署西安
將軍主軍饗策妄阿喇布坦自噶順汛山後道沙拉侵青海執台吉羅卜藏丹
濟布以去命額倫特率師駐西甯爲青海諸部應援五十六年策妄阿拉布坦
遣其將策凌敦多布侵西藏命額倫特移軍青海與青海王台吉等議屯軍形
勝地額倫特疏言西甯入藏道有三庫庫賽爾嶺拜都嶺道皆寬廣請與侍衛
色楞分道進兵五十七年策凌敦多布入西藏破布達拉城戕拉藏汗執其子
蘇爾咱遂據有其地六月額倫特與色楞分道進兵額倫特出庫庫賽爾嶺七
月至齊諾郭勒策凌敦多布遣兵夜來侵擊之退次日復至額倫特親督兵緣
山接戰賊潰遁追擊十餘里多所斬獲疏入上深嘉其勇俄策凌敦多布遣兵

潛出喀喇烏蘇額倫特率所部疾趨渡河扼狼拉嶺據險禦敵比至喀喇烏蘇色楞以兵來會合力擊賊賊數萬環攻額倫特督兵與戰被重創戰益力相持者數月九月復厲兵進戰射殺賊甚衆矢盡持刀麾兵斫賊賊益兵合圍額倫特中傷猶力戰遂沒於陳五十八年喪還上命諸王以下迎城外內大臣侍衛至其家奠茶酒世宗卽位進世職三等阿達哈哈番賜祭葬諡忠勇額倫特與川陝總督晉泰皆自行伍中爲上所識拔額倫特以廉潔著上嘗與張伯行並稱謂在督撫中操守最優也康泰甘肅張掖人初入伍累擢至游擊從將軍孫思克擊噶爾丹以功授世職拖沙喇哈番四遷四川提督額倫特駐西甯泰率松潘兵千餘出黃勝關爲應援兵諫奪官命自具鞍馬從軍從額倫特入藏戰喀喇烏蘇躍馬殺賊矢集於臂叱其子拔矢裹臂復戰陳沒贈都督同知諡壯勇弟海陝西涼州總兵將所部從額倫特同時戰死贈世職拖沙喇哈番論曰厄魯特亦出於蒙古析爲四衛拉特其一曰綽羅斯牧伊犁噶爾丹戕兄子自立乃號準噶爾移帳阿爾泰山兼有四衛拉特北侵喀爾喀南侵衛藏聖

祖再親征乃摧敗以死烏闌布通之役噶爾丹敗遁我軍亦重岨佟國綱以元
舅死綏及戰昭莫多費揚古麾飢疲之衆當困鬥之寇蹈瑕以破堅則謀勇勝
也馬斯喀阿南達吉勒塔布化行育龍先後在事有勞額倫特孤軍殉寇青海
之師準部之滅皆於是乎起謹書之以著其本末

清史稿

列傳六十九

姜希轍

余縉

德格勒

陳紫芝

宣重光

任宏嘉

高層雲

沈愷曾

龔翔麟

高遐昌

姜希轍字二濱浙江會稽人明崇禎間舉人順治初除溫州教授五年以瑞安知縣缺員令暫攝鄭成功兵來犯攻城希轍督民守遇事立應援至破成功兵齊雲江上九年遷直隸元城知縣畿北饑流民至者日以萬計逃人令方嚴民慮溷入為累輒拒不予食希轍令察非逃人使墾縣中荒田田闢饑民以活善決獄民稱之十五年授工科給事中吏得盜自列義王孫可望家人為買馬鑲白旗丁為之因緣希轍疏言可望來歸本朝滿滌不暇尚敢收亡命相關通身為旗丁豈復應桀驁冒法網夫盜有根柢有黨羽臣請收義王家人及旗丁窮

治之上下其疏罪人皆抵法國初考功法獲逃人闢荒田督運漕糧皆躐等陞擢希轍疏爭非政體不當開倖進上方嚴罪貪吏吏往往曲法罰緩希轍疏言例贖杖分有力無力所輕重不過銖兩間今乃倍五倍十不拘成數不應則敲朴隨之是昔以罰省刑今以罰濟刑也命仍如定例十七年上詔求言希轍疏言臣聞君臣一德原未嘗以憂勞之任獨歸之君父爲人臣諉卸責地也臣觀今日積習病根大要有二巧於卸肩者假詳慎以行推諉畏於任事者飾持重以蹈委靡請進一德之箴爲中外諸臣誠師自江西下廣東州縣供億繁重南贛巡撫報曲江始興兩知縣同時自戕希轍疏言大兵所集米豆草束槽鑿釜鑊自所必需然先時傳檄使之預備供億雖艱何至捐債行兵不嚴責在總督立法不預責在巡撫二者必居一於是請飭察究尋更厯兵禮二科時會計法嚴錢糧完欠每項各限十分定考成條例繁賾有司救過不給希轍疏請總歸十分以一歲之徵收計一歲之款項起訖既清稽核亦便自此部計稍紓有司得久任康熙元年考滿內陞回籍待闕九年詣京師復授戶科都給事中具三

疏請增科員請令巡撫得轄兵防地方竊發請緩奏銷之期使催科不迫遷順天府丞遭父喪歸十七年授奉天府丞乞養母歸三十七年卒於家

余縉字仲紳浙江諸暨人順治九年進士授河南封邱知縣兵後流亡未復棄地彌望朝議興屯設道廳董之民田徵賦屯田徵租租視賦爲重民棄屯不耕府縣吏急考成以屯租散入田賦民失業總督李蔭祖行部至縣縉導觀民間困苦狀蔭祖疏聞興屯道廳悉罷十七年行取授山西道御史乞養歸起河南道御史康熙初鄭成功已死其子錦屯廈門有議棄舟山者縉上疏爭之略謂浙江三面環海寧波尤孤懸海隅以舟山爲外藩不知行間諸臣何所見而倡捐棄之議江海門戶斂手委之逆豎夫閩海祇一廈門數萬之衆環而攻之窮年不能下奈何以已克之舟山增其巢穴福建總督李率奏議遷海濱居民縉復疏爭之略謂海濱之民與賊狎處一二冥頑貪狡嗜厚利通消息以相接濟者固未必無之但據所稱排頭方田諸處民或盜牧馬或縛窮民潛送廈門當此兩軍相望巡徼嚴密雖有好宄安能飛渡是其號令不肅已可概見又云派

撥舵工水手公然不應海上舵工名曰老大其人必少長海舟內外洋島嶼徑路靡不熟歷而後駕風使舵操縱自如奈何責之素不練習之民視同里役橫加僉派彼卽勉強應役技既不精心復叵測萬一變從中起將置數十萬奮戈持滿之士於何地兩疏語皆切至聖祖親政順治間建言諸臣坐遷謫者次第赦還惟議及逃人不在赦例居數年詔寬逃人禁縉疏請敕部察當日建言被謫諸臣存者召還錄用歿者歸葬贈卹尋命巡視長蘆鹽政以改葬乞歸二十八年卒於家縉廉而能治事尤持正妖人朱方日言禍福朝士多信之縉曰此妄男子耳於法當誅方日卒坐死

德格勒滿洲鑲藍旗人康熙九年進士選庶吉士授編修累擢侍讀學士充日講起居注官掌院學士李光地亟稱其賢聖祖時召見講論經史嘗扈從巡行大學士明珠柄政務結納士大夫將餽金爲治裝德格勒以裝具固辭不受會久早上命德格勒筮遇夫問其占曰澤上於天將降矣而卦義五陽決一陰小人居鼎鉉故天屯其膏決去之卽兩上愕然曰安有是德格勒遂以明珠對明

珠聞大惡之時以蜚語上聞謂德格勒與侍講徐元夢互相標榜徐元夢亦不附明珠者也故並嫉之二十六年光地乞假歸入辭面奏德格勒徐元夢學博文優逾月上召尙書陳廷敬湯斌等及德格勒徐元夢試於乾清宮閱卷畢諭曰朕政暇好讀書然不輕評論古人評論古人猶易評論時人更難如德格勒每評論時人朕心不謂然故召爾等面試妍媸優劣今已判然學問自有分量毋徒肆議論爲也二十七年明珠罷未幾掌院學士庫勒訥劾德格勒私抹起居注並與徐元夢互相標榜下刑部論罪故事起居注數易藁然後登籍德格勒所刪易者實未定藁也讞上論斬命改監候秋後處決徐元夢亦坐譴語詳徐元夢傳光地還京師上命尙書張玉書等以德格勒試卷示九卿並詰光地於是玉書等奏稱德格勒文實鄙陋光地亦以妄奏引罪命從寬免究德格勒尋遇赦釋歸本旗卒

陳紫芝字非園浙江鄞縣人康熙十八年進士選庶吉士改陝西道御史力持風紀絕外僚餽遺巡視南城捕大猾鄧二寘諸法疏言朝章國典宜畫一民間

冠昏喪祭未有定制請編纂禮書頒行天下又請裁屯衛以屯務屬州縣則田賦可覈逃盜可清詔並允行時督撫監司皆由廷臣保舉湖廣巡撫張汧大學士明珠所私也恃勢貪暴言路莫敢摘發二十六年紫芝上疏劾之言汧莅任未久贖貨多端凡地方鹽引錢局船埠靡不搜括甚至漢口市肆招牌亦按數派錢當日保舉之人必有賄囑情弊請一併敕部論罪上命奪汧官遣直隸巡撫于成龍山西巡撫馬齊副都御史開音布往按治復諭廷臣謂汧貪婪無人敢言紫芝獨能彈劾卽予內陞成龍等按得汧以前官福建布政使虧帑令屬吏彌補又派收鹽商銀九萬上荆南道祖澤深婪取於民又八萬讞上論絞保舉汧爲巡撫者侍郎王遵訓學士盧琦大理寺丞任辰旦皆坐奪官擢紫芝大理少卿每讞獄稍涉矜疑卽爲駁正多所平反紫芝以峭直受上知同朝多側目無何卒或傳紫芝一日詣朝房明珠延坐進茗飲之歸遂暴卒云筮重光字在辛江南句容人順治九年進士自刑部郎中考選御史巡按江西與明珠忤罷歸初鄭成功犯鎮江重光縋城乞援事平賜御書榜卒祀鄉賢

任宏嘉字葵尊江南宜興人初以舉人官行人康熙十五年成進士十八年考選江南道御史巡南城疏言各州縣宜有講堂書院庶人知嚮學又言學道不惟受制藩司抑且受制知府蓋府道階級不甚懸無以資表率部郎聲望不甚重又無由達封章求其公明實不可得乞重其選改巡北城疏陳五城應行事謂盜風未靖由保甲不行稽察未清由旗民雜處司坊未潔由勸懲不當又言州縣昏夜比較鄉民託宿無地飢寒受杖往往殞命又或因分釐火耗之輕受簽役橫索之累又言朝廷清丈所以爲民而藩府駁冊上下動費累百津梁有關所以禦暴今水港皆設巡攔旱路亦行堵截檢索至負擔稅課編雞豚所言皆痛切宏嘉一日巡城有錦衣駿馬突其前訶叱之隸卒白曰此王府優也宏嘉趨王府索優出杖之四十上聞直宏嘉由是貴戚斂跡毋敢玩法尋掌山東道兼江南道如故上十漸疏一曰朋黨交結之漸始因交際爲餽遺漸以愛憎成水火二曰奢侈僭踰之漸物力旣殫等威亦紊三曰文武訐訕之漸督撫提鎮挾私互訐小吏效尤何以使民無訟四曰紳士吹求之漸有司視如仇讐姦

民以爲魚肉五曰上下奉違之漸國家良法美意奉行者徒有虛文過當者反
成弊政六曰名器混淆之漸爲生養萬民計守令宜用正途七曰常平侵漁之
漸貯穀久易浥損又難盤察不若聽民輸錢數易稽而無朽蠹八曰河工興建
之漸從古無不徙之河治河惟去其太甚不必議開議塞借一勞永逸之辭爲
逐利倖功之術九曰情罪過當之漸如逃人止於鞭刺過宿反至竄流輕重不
平枉誣尤甚十曰積習膠固之漸升遷則趕缺壓缺處分則忽重忽輕視爲故
常營競特甚復疏論銓政不平並下部議行三十三年遷奉天府府丞兼學政
轉通政司參議署通政使丁母憂歸服闋病日卒於家宏嘉素慎疏上言過直
輒戰慄或曰子蕙若此何如不言曰宏嘉之戰慄氣不足也然知其當言不敢
欺吾心尤不敢負吾君耳

高層雲字二鮑江南華亭人康熙十五年進士授大理寺評事二十五年授吏
科給事中二十六年太皇太后崩詔王大臣集永康左門外議喪禮大學士王
熙等向諸王白所議跪移時李之芳年老起而踣層雲曰是非國體也即日疏

言謂天潢貴胄大臣禮當致敬獨集議國政無弗列坐所以重君命尊朝廷也况永康左門乃禁門重地太皇太后在殯至尊居廬天威咫尺非大臣致敬諸王之地大學士爲輔弼大臣固當自重諸王亦宜加以禮節不可驕恣倨慢坐受其跪失藩臣體疏入上曰朕召大臣議事如時久每賜墊坐語今大臣爲諸王跪於禮不合下宗人府吏禮二部議嗣後大臣與諸王會議不得引身長跪著爲令二十八年京師早詔求言層雲疏論江淮間行屯田擾民請急停蘇民困上嘉納之遷通政司參議二十九年遷太常寺少卿卒官

沈愷曾字樂存浙江歸安人康熙二十六年進士選庶吉士三十年改山東道御史喀爾喀率屬內附上親出塞拊循愷曾疏言巡行口外爲蒙古諸臣定賞罰編戶口安插新附但聖躬遠出間關崎嶇乘輿勞頓於外羣臣晏息於家臣心何安宜遣部院大臣經理令逐一奏聞仍與皇上親行無異乞傳旨暫緩此行疏入不報上還京師召愷曾入對賜宴三十五年上親征噶爾丹歲暮以餘孽未靖復出塞愷曾復上疏請回鑾語甚剴切順天學政侍郎李光地有母喪

命奪情視事光地請給假九月言路大譁愷曾疏言學臣關繫名教表率士子使衰經者衣錦論文其何以訓宜令終喪以隆孝治閣臣職司票擬理應委曲奏請始不當有在任守制之票既不當有仍遵前旨之擬科臣職司封駁閣臣票擬不當科臣繳旨覆奏固其職也乃亦復默然不知其所謂封駁者何在也臣不敢以妄擬閣臣爲嫌劾奏同列爲咎疏入下九卿議尋用彭鵬言令解任在京守制陝西提督孫思克請令富民納粟佐軍愷曾論奏乞敕部停止上是之入臺七年疏數十上伉直敢言厯掌山西江南浙江河南道事管登聞院三十八年巡兩廣鹽課多惠政商民德之報滿留任一年還京復掌山西道丁父憂以廣東運使罣誤事連坐罷官四十四年上南巡召試行在稱旨賜御書尋卒

龔翔麟字蘅圃浙江仁和人父佳育字祖錫自龍驤衛經歷出知安定縣又自兵部郎中出爲分巡通水道僉事擢江南布政使所至有聲績入授光祿寺卿命修賦役簡明書未竟卒翔麟自副貢生授兵部主事出權廣東關稅沿海諸

稅口遠者去省二千里吏役苛索商民重困翔麟嚴其禁並移行府縣察究康熙三十三年考選陝西道御史遂疏請以諸稅口交府縣徵收著爲令尋命巡視西城大學士熊賜履以誤擬旨罷復起爲吏部尙書翔麟疏劾賜履竊講學虛聲前因票擬錯誤嚼毀草籤卸過同官皇上從寬放歸田里旋賜起用晉位冢宰毫無報稱其弟賜瓚包攬捐納奉旨傳問賜履不求請處分猶泰然踞六卿之上乞賜罷斥右通政張雲翮故靖逆侯勇子勇妻李卒雲翮不居喪翔麟疏劾雲翮縱非李出嫡母繼母並制三年豈可視爲陌路乞嚴加議處以儆敗類雲貴總督趙良棟討吳三桂定雲南以敘功未允爲部下乞恩屢有求請翔麟疏劾良棟効力行間悉由皇上指授方略蕩平後敘功既經廷議重以睿裁輕重無不允當事閱十年而良棟猶嘒嘒不已妄肆薦揚市恩於衆借矜己功且越例求賜莊田房屋言詞狂悖大不敬乞下所司定罪賜履雅負清望良棟功臣雲翮功臣子翔麟論列無所避以是得直聲俄又劾賜履及侍郎趙士麟亂銓政條列以上官御史十年乞歸貧至不能舉火蕭然不改恒度尋卒

高遐昌字振聲河南淇縣人康熙十五年進士授湖南龍陽知縣以屯賦重請減與民田同額父憂去服闋補廣東東莞知縣歷茂名信宜護高州知府皆有聲行取擢刑部主事累遷戶部郎中四十六年授戶科給事中時提督九門步軍統領託合齊恃權不法給事中王懿德列款疏劾上方幸熱河遐昌詣行在繼劾之略言託合齊欺罔不法經懿德糾參臣又何敢置喙伏念其所以橫恣皆緣握權太過自督捕裁而所轄三營改歸提督悍將驕兵毫無忌憚請仍歸兵部擇司官督率考勤惰禁勒索營務防汛晝夜巡邏即有奸匪不得妄牽無辜私刑酷訊提督干預詞訟奸民構弁兵擇人而噬民不聊生請仍歸大宛二縣五城司坊巡城御史以及府尹治中逃盜命案歸於刑部一秉國法提督管理街道縱其兵丁肆爲貪噬勢壓官民請五城分治仍歸司坊每年工部保題司官督理庶法官守制無復軼越此皆本朝舊例當歸所司防微杜漸不致成積重之勢疏上上以巡捕三營併步軍統領非自託合齊始司坊管街道畏懼顯要止知勒索舖戶故亦歸併步軍統領今既累商民即以遐昌兼管期一年

責以肅清遐昌既任事革除陋規街道溝渠次第平治兵民以安兩屆報滿仍命接管託合齊陰圖報復欲伺隙中傷五十年上自暢春園還見內城街道被侵占甚窄召託合齊詰責之託合齊奏外城尤窄命尙書赫碩色等察勘託合齊故引視僻巷民居占官街得三百餘間謂皆遐昌任內所造逮下刑部獄尙書齊世武託合齊黨也將刑訊主事蔣晟持不可乃議遐昌以官街邀民譽應發奉天安置託合齊黨復譁言遐昌受賂嚴訊家屬定爰書謂據供雖未受賂但風聞街道舊規鋪戶修房每間與胥役錢二三百以此例之房三百餘間計錢七百五十千當枉法贓律處絞朝審具寃狀尙書王揆李天馥謂遐昌廉能爲上知宜從寬典富寧安贊之獄乃緩會託合齊以病乞假隆科多攝其職因言託合齊罔上行私橫恣貪婪及誣陷遐昌狀上命釋遐昌都人爭赴獄舁之出擁赴闕謝及出都送者填溢釀金完懸贓遐昌歸未幾卒

論曰康熙間以直言著者魏象樞郝浴楊素蘊彭鵬趙申喬輩數歷中外卓然爲名臣希轍縉自世祖朝已在諫垣有獻替宏嘉論十漸層雲爭國體陳義皆

清史稿
甚高若德格勒紫芝重光忤明珠愷曾彈李光地翔麟論熊賜履趙良棟遐昌
抗託合齊雖所糾繩賢不肖不同謇謇匪躬不爲名懼不爲勢撓諡爲遺直殆
無愧歟

清史稿

列傳七十

覺羅武默訥

舒蘭

拉錫博靈

阿拉錫子旺札爾

圖理琛

何國宗

覺羅武默訥正黃旗人景祖第三兄素長阿四世孫也順治四年授世職拖沙

喇哈番累進三等阿達哈哈番擢一等侍衛康熙六年授內大臣管佐領十六

年命偕侍衛費耀色塞護禮索鼎瞻禮長白山諭曰長白山祖宗發祥之地爾

等赴吉林選識路之人瞻視行禮並巡視寧古塔諸處於大暑前馳驛速往五

月己卯武默訥等發京師己丑至盛京東行戊戌至吉林詢土人無知長白山

路者得舊居額赫訥殷獵戶岱穆布魯言其父曾獵長白山麓負鹿歸道經三

宿似去額赫訥殷不遠自吉林至額赫訥殷陸行十日舟行幾倍之寧古塔將

軍巴海令運米十七艘詣額赫訥殷先發並令協領薩布素護武默訥等行六

月丁未武默訥等携三月糧陸行經溫德亨河庫埒訥嶺奇爾薩河布爾堪河

納丹弗埒城輝發江法河卓隆鄂河抵訥殷江千米亦至乃乘小舟與薩布素

分道行泝訥殷江逆流上丙寅會於額赫訥殷一望深林無路薩布素率衆前行伐木開道遣人還告行三十里得一山升其巔緣木而望長白山乃在百餘里外片片白光如積玉視之甚晰戊辰武默訥前行己巳遇薩布素於林中壬申黎明大霧莫辨山所向聞鶴唳尋聲往遇鹿蹊循行至山麓見周遭密林中間平迤圓繞有草無木前臨小林盡處有白樺木整若栽植及旋行林外仍瀰漫無所見跪誦敕旨拜畢霧開峯巒歷歷在目登陟有路遙望之山修而扈旣近則堂平而宇圓向所睹積玉光冰雪所凝也山峻約百餘里巔有池環以五峯其四峯臨水拱峙正南一峯稍低分列雙闕池廣袤約三四十里夾山澗水噴注自左流者爲松花江右流者爲大小訥殷河繞山皆平林武默訥瞻拜而下峯巔羣鹿奔逸仆其七墜武默訥等前時登山者正七人方乏食謝山靈賜卻行未里許欻然霧合癸酉還至前望處終不復見山光七月庚辰至恰庫河馬疲甚甲申自恰庫河乘舟還經色克騰圖伯赫噶爾漢噶達渾薩穆薩克錫法克什多瓊諸河至松花江八月丁未還吉林巡視寧古塔諸處乙丑還京師

疏聞詔封長白山之神秩祀如五嶽十七年命武默訥齋敕往封歲時望祭如典禮十九年召入養心殿命工繪其像以賜諭曰以此像俾爾子孫世世共享以昭恩寵二十九年卒賜祭葬

舒蘭納喇氏滿洲正紅旗人父敦多哩官刑部侍郎兼佐領坐鞫總督蔡毓榮罪附和尙書希福從輕比奪官戍黑龍江舒蘭自理藩院筆帖式遷主事康熙三十八年從侍郎滿丕都統烏達禪等招降巴爾瑚三千餘人安置察哈爾游牧地編隸佐領未幾巴爾瑚佐領額克圖叛戕察哈爾副總管阿必達驍騎校班第掠馬駝以遁上命喀爾喀公錫卜推哈坦等率蒙古兵追勦舒蘭持檄傳示蒙古諸貝勒台吉并徵察哈爾厄魯特兵從烏達禪會勦禽其渠遷內閣侍讀四十年命偕侍衛拉錫往探河源諭曰河源雖名古爾班索里瑪勒其發源處人跡罕到爾等務窮其源察視河流自何處入雪山邊內凡經流諸處宜詳閱之四月辛酉舒蘭等發京師五月己亥至青海庚子至庫庫布拉克貝勒色卜騰札勒與偕行六月癸亥至鄂稜諾爾甲子西行至札稜諾爾鄂稜周二百

餘里札稜周三百餘里二諾爾距三十里許乙丑至星宿海蒙古名鄂敦塔拉星宿海之源小泉萬億厯厯如星衆山環之南有山曰古爾班圖勒哈西南有山曰布瑚珠勒赫西有山曰巴爾布哈北有山曰阿克塔齊勒東北有山曰烏闌都什蒙古總名曰庫爾坤即崑崙也山泉出自古爾班圖勒哈者爲噶爾瑪塘出自巴爾布哈者爲噶爾瑪楚木朗出自阿克塔齊勒者爲噶爾瑪沁尼三山之泉溢爲三支河即古爾班索里瑪勒也三河東流入札稜諾爾札稜一支入鄂稜諾爾黃河自鄂稜出其他山泉與平地水泉淵淪滌繞不可勝數悉歸黃河東下丁卯舒蘭等自星宿海還舍故道循河流東南行己巳登哈爾吉山見黃河折而東至庫庫陀羅海山又南繞薩楚克山復北流經巴爾陀羅海山之南庚午達阿木尼瑪勒占穆遜山山最高雲霧蔽之不可端倪蒙古人言長三百餘里有九高峯積冰終古不消常雨雪一月得晴僅三四日舒蘭等自此返壬申至錫喇庫特勒又南過僧庫爾高嶺更百餘里至黃河岸見黃河自巴爾陀羅海山東北流經歸德堡北達喀山南兩山峽中流入蘭州自京師至星

宿海七千六百餘里寧夏西自松山至星宿海天氣漸低地勢漸高人氣閉塞行多喘息九月還京師具疏述所經並繪圖以進上諭廷臣曰朕於古今山川名號雖在邊徼遐荒必詳考圖籍廣詢方言務得其正故遣使至崑崙日擊詳求載入輿圖即如黃河源出西塞外庫爾坤山之東衆泉煥散燦如列星蒙古謂之鄂端塔拉西番謂之索里瑪勒中華謂之星宿海是爲河源匯爲札稜鄂稜二澤東南行折北復東行由歸德堡積石關入蘭州其原委可得而縷晰也舒蘭累擢內閣學士四十五年命往西藏封拉藏爲翊法恭順汗回京得風疾遣太醫診視越二年疾復發乞休許解任調治五十二年疾愈起故官是年以萬壽恩典復其父敦多哩故秩尋遷工部侍郎未幾坐事降三秩調用五十九年卒拉錫圖伯特氏蒙古正白旗人自親軍校三遷二等侍衛偕舒蘭窮河源進一等雍正初累擢本旗都統以治事明敏予拜他喇布勒哈番世職授議政大臣拉錫諳習旗務奏事輒稱旨累被褒嘉加授拖沙喇哈番四年以隱匿烏梁海事盡削官職降授一等侍衛管太僕寺卿尋仍擢鑲白旗滿洲都統迭署

江甯將軍天津滿洲水師都統授領侍衛內大臣卒子旺札爾初授侍衛襲世職使從侍郎阿克敦與噶爾丹定界如蘇州如浙江按事累遷鑲白旗滿洲都統理藩院侍郎御前大臣命赴金川察沿途驛站金川平擢領侍衛內大臣卒諡恪慎子博靈阿襲世職初授侍衛累遷正藍旗蒙古副都統從征金川攻當噶爾拉撲碉受創卒贈都統銜進世職一等輕車都尉圖形紫光閣乾隆四十七年高宗命侍衛阿彌達詣西甯祭河神再窮河源還奏星宿海西南有水名阿勒坦郭勒更西有巨石高數丈名阿勒坦噶達素齊老蒙古語阿勒坦爲黃金噶達素爲北極星郭勒爲河齊老石也崖壁黃金色上有池池中泉噴涌醞爲百道皆黃金色入阿勒坦郭勒廻旋三百餘里入星宿海爲黃河真源高宗命四庫館諸臣輯河源紀略識其事阿彌達更名阿必達大學士阿桂子附見阿桂傳

圖理琛阿額覺羅氏滿洲正黃旗人以國子生考授內閣中書遷侍讀坐事奪

職康熙五十一年特命復職出使土爾扈特初土爾扈特汗阿玉奇從子阿喇

布珠爾假道準噶爾赴西藏謁達賴喇嘛準噶爾台吉策妄阿喇布坦與阿玉奇構怨阿喇布珠爾不得歸款關乞內屬詔封貝子賜牧嘉峪關外黨色爾騰嗣阿玉奇遣使入貢上欲歸阿喇布珠爾命圖理琛偕侍讀學士殷札納郎中納顏齋敕諭阿玉奇假道鄂羅斯五月圖理琛等自京師啟行七月至鄂羅斯境楚庫柏興以假道故待其國察罕汗進止五十二年正月許假道乃行還烏的柏興越柏海爾湖而北抵厄爾庫鄂羅斯託波爾噶噶林遣其屬博爾科尼來迎噶噶林者彼國所稱總管也圖理琛等欲行博爾科尼言噶噶林令天使當自水路行而昂噶拉河冰未泮請稍駐俟之三月自昂噶拉河乘舟抵伊聶謝柏興登陸五月抵麻科斯科復乘舟自揭的河順流行經那里穆柏興蘇爾呼特柏興薩瑪爾斯科狄穆演斯科諸地七月至託波爾其地噶噶林名馬提飛費多里魚赤迎至廨留八日仍遣博爾科尼護之行抵鴉班沁登陸自費耶爾和土爾斯科越佛落克嶺抵索里喀穆斯科以路寧守凍十日復行經改郭羅多黑林諾付喀山西穆必爾斯科諸地十一月至薩拉託付是爲鄂羅斯與

土爾扈特界水自東北來折而南鄂羅斯號爲佛爾格土爾扈特號爲額濟勒阿玉奇汗駐牧地曰瑪努託海距此十日程以雪盛不能行五十三年四月阿玉奇遣台吉祥偉徵等來迎五月圖理琛等渡額勒河阿喇布珠爾之父納札爾瑪穆特遣獻馬卻之六月朔至瑪努託海阿玉奇擇日聽宣敕圖理琛等以上意諭之曰阿喇布珠爾已賜爵優養欲遣歸爾牧地以策妄阿喇布坦方與爾交惡恐爲所戕爾若欲令阿喇布珠爾歸當自鄂羅斯來迎阿玉奇曰我雖外夷然冠服與中國同鄂羅斯乃嗜欲不同言語不通之國也天使歸道當察其情狀鄂羅斯若以往來數故不假道則我無由入貢矣阿喇布珠爾荷厚恩與歸土爾扈特同復何疑慮阿玉奇及納札爾瑪穆特等各贈馬及方物圖理琛等以越境無私交卻不受阿玉奇待之有隆禮留十四日筵宴不絕復附表謝奏圖理琛等遂行由舊路歸鄂羅斯遣護如初五十四年三月還京師是役也往返三載餘經行數萬里蓋土爾扈特爲鄂羅斯所隔遠阻聲教而鄂羅斯又故導我使紆道行圖理琛奉使無辱命旣歸國入對述往還事狀並撰異域

錄首冠輿圖次爲行記呈上覽上嘉悅尋授兵部員外郎阿喇布珠爾亦遂留
牧黨色爾騰不復遣再傳至其子丹忠雍正中遷牧額濟內河圖理琛遷郎中
世宗即位命赴廣東察藩庫就擢廣東布政使調陝西三年擢巡撫五年召爲
兵部侍郎調吏部偕喀爾喀郡王額駙策棱等往定喀爾喀與鄂羅斯界仍調
兵部六年追議前定界時與鄂羅斯使臣薩瓦鳴礮謝天私立木牌並擅納鄂
羅斯貿易人入界又前任陝西巡撫時將天下兵數繕摺私給將軍延信逮問
論斬詔宥免遣築札克拜達里克城高宗即位授內閣學士遷工部侍郎乾隆
元年以老解侍郎任仍爲內閣學士二年引疾去五年卒

何國宗字翰如順天大興人康熙五十一年進士改庶吉士命直內廷學算法
五十二年命編輯律厯淵源未散館授編修三遷至庶子雍正初授侍讀學士
再遷至內閣學士三年命視黃運河道奏請增築戴村石壩疏濬東昌城南七
里河城北魏家灣及德州城南減河又以汶泗泉源紆遠請專設管泉通判又
請修高家堰石隄上皆允其請並以高家堰石隄工衝要命發帑興修復奏言

運河自臨清以上賴衛水以濟衛水發源百泉益以丹洹二水其流始盛請疏百泉爲三渠洹河亦築壩開渠引水一分灌田三分濟運上從其議旋以山東巡撫塞楞額奏言國宗等奉使所經州縣供億白金七千六百有奇上責國宗不惜物力負任使坐降調五年授大理寺卿六年復擢內閣學士遷工部侍郎六年命與侍郎牛鈕督修北運河減水壩並濬引河國宗等議捍護河西務北堤及要兒渡魚鱗壩別開塌河淀下流賈家沽洩水河建築三里淺筐兒港張家莊諸處挑水壩上命如議速行九年兼河東河道總督田文鏡奏戴村初建亂石滾水三壩汶水盛漲白壩面流入鹽河歸海國宗等增築石壩水不能過瀕河連年被患請毀石壩復爲亂石滾水壩上責國宗勘工錯誤貽害民間奪官乾隆初起充算學館律呂館總裁九年賜秩視三品尋授左副都御史十年兼領欽天監正十三年遷工部侍郎康熙間聖祖命製皇輿全覽圖以天度定準望一度當二百里遣使如奉天循行混同鴨綠二江至朝鮮分界處測繪爲圖以鴨綠圖門二江間未詳晰五十年命烏喇總管穆克登偕按事部員復往

詳察國宗弟國棟亦以通歷法直內廷五十三年命國棟等周歷江以南諸行省測北極高度及日景五十八年圖成爲全圖一離合凡三十二幀別爲分省圖省各一幀命蔣廷錫示羣臣諭曰朕費三十餘年心力始得告成山脈水道俱與禹貢合爾以此與九卿詳閱如有不合處九卿有知者舉出奏明乃鑄以銅版藏內府高宗既定準噶爾二十一年命國宗偕侍衛努克三哈清阿率欽天監西洋人往伊犁自巴里坤分西北兩路測天度繪圖既還報命署左都御史二十二年授禮部尙書以京察舉弟國棟坐徇庇奪官尋授編修直上書房二十八年復授內閣學士是歲上以諸回部悉定復遣尙書明安圖等往測天度繪圖是爲乾隆內府皇輿圖二十六年遷禮部侍郎二十七年以老休致三十一年卒

論曰國家撫有疆宇謂之版圖版言乎其有民圖言乎其有地聖祖東訪長白山西探河源北撫土爾扈特武默訥舒蘭圖理琛奉使稱職觀所還奏曲折詳盡歷歷如繪國宗以明算事聖祖又幸老壽迨高宗朝詣新疆測繪康熙乾隆

兩內府圖皆躬與編摹揆之於古其裴秀賈耽之倫歟

裴秀之造魏地志也其法用方幅每方百里其方幅之制也

賈耽之造唐地志也其法用方幅每方百里其方幅之制也

宋之造地志也其法用方幅每方百里其方幅之制也

元之造地志也其法用方幅每方百里其方幅之制也

明之造地志也其法用方幅每方百里其方幅之制也

清之造地志也其法用方幅每方百里其方幅之制也

今之造地志也其法用方幅每方百里其方幅之制也

昔者一書命謀及論不羣亞編曰通覽三十卷其小氏故特古

而正統曰其天日經正和尺平廣如益全圖之聯合且三十

而正統曰其天日經正和尺平廣如益全圖之聯合且三十

而正統曰其天日經正和尺平廣如益全圖之聯合且三十

覺羅滿保 陳策

施世驃

藍廷珍 從弟鼎元

林亮 何勉 陳倫燭

歐陽凱 羅萬倉 游崇功

覺羅滿保字鳧山滿洲正黃旗人康熙三十三年進士選庶吉士授檢討累遷國子監祭酒擢內閣學士直經筵五十年授福建巡撫疏言福建興化泉漳等屬十六州縣皆瀕海要地請揀選直省卓異官除授御史璩廷祐論其不可部議以為然詔下九卿等再議卒從滿保言五十四年擢福建浙江總督命巡海議自乍浦至南澳沿海五千餘里建臺寨百二十七所礮位千一百七十有八別疏言鹿耳門為臺灣咽喉澎湖為廈門藩衛安平鎮為水師三營重地及海洋各口岸宜分極衝次衝築墩臺設汛巡守並嚴察海舶出入禁漁船私載米糧軍器又言淡水雞籠山為臺灣北界其澳港可泊巨艦百餘更進為肩豆門沃野百里番社交據請增置淡水營設官駐防為後蔽皆報可六十年鳳山民

朱一貴爲亂臺灣知府王珍苛稅濫刑鳳山民黃殿李勇吳外等集數百人謀變一貴素販鴨託明裔以爲渠刼岡山塘棟榔林二汛掠軍器衆益聚遂破縣城進陷臺灣總兵歐陽凱等率兵禦賊師敗績死之臺廈道梁文煊等走澎湖滿保疏聞督兵趨廈門值淫雨乘竹兜從數騎行泥淖中比至籍丁壯剽悍能殺賊者悉充伍嚴申軍令禁舟師毋登陸民以不擾淡水營守備陳策使詣廈門乞援滿保移會巡撫呂猶龍遣兵自閩安渡淡水未幾南澳鎮總兵藍廷珍率舟師至滿保命統水陸軍會提督施世驃於澎湖剋期進勦六月世驃廷珍攻鹿耳門敗賊安平鎮遂克臺灣上以臺灣民附亂非本意敕滿保招撫尋諸羅民楊旭等密約壯丁六百人擒一貴及其黨十二人獻世驃軍前檻送京師磔於市是役自出師迄事平凡七日上嘉滿保調度有方加兵部尙書尋疏言賊起惟守備陳策鼓勵兵民堅守汛地待大兵進援奮力效忠命擢臺灣總兵復疏劾珍縱役需索致一貴乘機倡亂文煊及所屬官吏一無備禦退回澎湖應奪官逮問從之文煊等論罪如律秋臺灣颶作滿保以聞諭臺灣有司平日

貪殘激變及大兵進勦殺戮之氣上干天和令速行賑卹上杭民溫上貴往臺灣從一貴得僞元帥札印還上杭煽鄉人從賊聞一貴誅走江西結棚匪數百謀掠萬載知縣施昭庭集營汛勦捕擒上貴及其黨十數人並伏法大學士白潢等條奏禁戢棚匪滿保疏言閩浙兩省棚民以種麻靛造紙燒灰爲業良莠不一令鄰坊保結棚長若有容庇匪類依律連坐有司於農隙遍履各棚嚴加稽察浙江鄞奉化等二十七縣福建閩龍巖等四十州縣皆有棚民宜如沿海州縣例揀員題補詔從之雍正三年卒官遺疏言新任巡撫毛文銓未至總督印信交福州將軍宜兆熊署理並留解任巡撫黃國材暫緩起程如舊辦事詔嘉其得體下部議卹時尙書隆科多獲罪鞫訊得滿保餽金交通狀世宗諭責滿保諂隆科多年羹堯命母賜卹予諡策字鍾侯福建晉江人由銅山守備調淡水一貴陷臺灣策孤軍力守一隅姦人范景文入境煽誘禽誅之師下臺灣滿保檄勦北路復南嵌竹塹中港後壘吞霄大甲諸社以功擢臺灣總兵加左都督卒

施世驃字文秉靖海侯煥第六子康熙二十二年世驃年十五從煥下臺灣委署守備臺灣既定以功加左都督銜授山東濟南城守參將三十五年聖祖親征噶爾丹天津總兵岳昇龍薦世驃從軍召試騎射命護糧運至奎素從大將軍馬斯喀追賊至巴顏烏闌師還假歸葬上褒世驃勤勞命事畢仍還任累遷浙江定海總兵四十二年上南巡賜御書彰信敦禮榜時海中多盜世驃屢出洋巡緝先遣裨將假商船餌盜擒獲甚衆斬盜渠江崙四十六年上南巡詢及擒斬海盜事溫諭嘉獎賜孔雀翎四十七年擢廣東提督五十一年調福建水師提督六十年朱一貴爲亂陷臺灣世驃聞報即率所部進扼澎湖總督滿保檄南澳總兵藍廷珍等以師會衆議三路進攻世驃謂南路打狗港在臺灣正南南風盛不可泊北路清風隙去府百餘里運饗艱度賊必屯聚中路宜直搗鹿耳門時臺地諸將吏皆退次澎湖惟淡水守備陳策堅守汛地世驃遣游擊張賊等赴援自統師出中路選勁卒乘小舟載旗幟分伏南北港六月抵鹿耳門賊踞礮臺以拒世驃登樓船督戰發礮中敵貯火藥器火大熾賊驚潰衆軍

齊進兩港悉樹我軍幟賊不敢犯揚帆直渡鯤身鯤身者海沙也水淺大舟不能過是日海水驟漲八尺餘舟乘風疾上遂克安平鎮翌日戰破賊賊悉衆來犯世驃遣守備林亮等進西港游擊朱文等越七鯤身自鹽埕大井頭分道登陸趨臺灣世驃督將士指揮布陣擊賊賊潰遂復臺灣一貴走諸羅諸羅民縛以獻賊黨擒斬略盡臺灣南北兩路悉平詔優敘賜世驃東珠帽黃帶四團龍補服未幾以疾卒於軍遺疏乞從父煇葬福建留妻子守墓上悉許之贈太子太保諡勇果雍正元年世宗命予一等阿達哈哈番世職以其子廷勇嗣世驃和易謙雅治軍嚴明與煇先後平臺灣皆以六月乘海潮異漲度師遂以成功藍廷珍字荆璞福建漳浦人少習騎射從祖理器之入伍自定海營把總累遷溫州鎮標左營游擊巡外洋屢獲盜盜皆畏避以是爲諸將所忌讒於總督滿保將劾之會關東大盜孫森等竊遼陽巨礮戰艦逸入海聖祖震怒責沿海疆吏嚴緝廷珍出巡海至黑水外洋與遇力戰盡獲森等九十餘人及其船艦礮械滿保按部至溫州廷珍迎謁以告滿保嘆曰幾失良將召入舟厚撫之亟疏

薦超擢福建澎湖副將未幾遷南澳總兵六十年朱一貴爲亂廷珍上書滿保策破賊狀滿保令統戰船四百將弁一百二十官兵一萬二千會提督施世驃於澎湖剋期進勦廷珍至澎湖言於世驃曰賊皆烏合不足憂惟脅從至三十萬人請檄示止殲渠魁餘勿問則人人有生之樂無死之心可不血刃平也世驃從之師至鹿耳門賊扼險拒守諸將林亮董芳當前鋒殊死戰廷珍率大隊繼之連戰皆捷賊大潰退保府治世驃遣亮等自西港仔暗度廷珍以大軍躡其後賊在蘇厝甲與亮等決戰廷珍分兵馳赴之賊望見旗幟戰稍卻乘勝追逐遂大潰夜駐犁頭標設伏以待賊果至四面突擊賊大亂自相攻殺追敗之木柵仔復敗之蔦松溪遂入府城秋毫無所犯民大悅一貴及其黨李勇吳外等皆就擒分遣諸將復南北二路署臺灣總兵秋南路阿猴林餘孽復起討平之招降陳福壽等十數人皆渠魁也未幾世驃卒廷珍攝提督餘賊黃殿等以次擒滅六十一年授臺灣總兵雍正元年擢福建水師提督加左都督賜孔雀翎予三等阿達哈哈番世職世宗褒廷珍忠赤惟屢勉以操守二年入覲命赴

馬蘭峪謁景陵賞賚稠疊七年病聞遣醫診視尋卒贈太子少保諡襄毅子曰
寵嗣世職官銅山營參將孫元枚自有傳族弟鼎元字玉霖力學負才廷珍統
師入臺灣鼎元參軍事著平臺紀略雍正元年詔舉文行兼優之士貢入太學
有司以鼎元薦大學士朱軾器之用薦得召見上書陳時政上嘉納授廣東普
甯知縣居官有惠政長於斷獄性伉直坐事劾罷總督鄂彌達白其誣召詣京
師旋署廣州知府甫一月卒鼎元嘗論臺灣善後策謂諸羅宜畫地更設一縣
總兵不可移駐澎湖後諸羅析縣曰彰化更設北路二營總兵官仍駐臺灣皆
如鼎元言

林亮字漢侯福建漳浦人少習騎射擊刺生長海濱島澳險夷舟航利鈍靡不
講求初授臺灣水師把總累遷澎湖協守備朱一貴陷臺灣官吏渡澎湖居民
洵懼將吏以孤島難守僉議撤歸廈門各遣家屬登舟亮按劍厲聲曰朝廷疆
土尺寸不可棄今鋒刃未血相率委去縱避賊刃能逃國法乎請整兵配船守
禦要害賊至決死戰戰不捷亮死君等去未遲乃馳赴海口申號令驅將吏家

屬登岸令敢言退廈門者斬時糧絕饑匱亮輸貲買穀碾米給軍製戰攻器械俟師至提督施世驃總兵藍廷珍以亮忠勇令當前鋒領舟師五百七十人抵鹿耳門一貴黨蘇天威據礮臺以拒亮率六艦直進發礮中敵火起斃賊無算乘勝進攻安平鎮亮先登樹幟賊潰走翌日鏖戰鯤身駕舟橫衝賊陣復大敗之賊退至府城世驃令亮分兵自西港仔暗度拊其背廷珍以軍繼進大戰賊死傷遍野遂克府治亮功最遷臺灣參將雍正元年敘平臺灣功加都督同知予一等阿達哈哈番世職是年秋入京上深嘉之擢水師副將賜孔雀翎二年授臺灣鎮總兵亮以臺灣初被兵加意撫綏整水陸兵防又招撫生番一百八社男婦一萬八百餘人亮因番嗜色布鹽糖遣吏厯各社齎賜之因宣布德意羣番悅服五年移浙江定海卒於官賜祭葬何勉字尚敏福建侯官人初授督標把總康熙五十八年薛彥文等聚後洋山爲匪勉奉檄捕擒之六十年從提督施世驃討朱一貴勉攻南路擒其黨杜會三蘇清等又於北路獲黃潛等二十六人明年遷臺灣鎮標千總時一貴餘黨王忠等出沒內山巡視臺灣御史

吳達禮督捕治總兵藍廷珍檄勉偵緝遣降卒爲導入鳳山深箐中獲賊黨劉富生思拒捕立擒之擢北路營參將予拖沙喇哈番世職雍正四年水連沙等社叛番蠢動總督高其倬檄從臺灣道吳昌祚按治勉攻北港番請降水連沙二十五社悉平遷湖廣洞庭協副將十年貴州九股苗作亂詔發湖廣兵二千協勦提督張正興檄勉領兵五百赴貴州進攻交汪寨勉乘霧夾擊苗敗遁復據蓮花峯築屯時貴州提督哈元生自台拱移軍至令勉攻其東勉先登奪壘賊竄走掩擊之陣斬其渠餘衆就擒擢雲南鶴麗鎮總兵調臨元復調廣東左翼五年調臺灣尋又移南澳署福建水師提督乾隆十年以疾乞休詔解任回籍調治尋召詣京師以篤老命原品休致十七年卒賜祭葬子思和嗣世職二十七年復官臺灣總兵陳倫炯字次安福建同安人父昂字英士弱冠賈海上習島嶼形勢風潮險易施烺征臺灣徵從軍有功授游擊累遷至碣石總兵擢廣東右翼副都統嘗上疏言西洋治厯法者宜定員毋多留留者勿使布教又以沿海居民困於海禁將疏請弛之會疾作命倫炯以遺疏進詔報可倫炯初

以廢生授三等侍衛雍正初授臺灣總兵調廣東高廉坐事降臺灣副將復授總兵歷江南蘇松狼山諸鎮擢浙江提督卒昂疏並言臣詳察海上諸國東海日本爲大次則琉球西則暹羅爲最東南番族文萊等數十小國惟噶囉吧呂宋最強噶囉吧爲紅毛一種中有英主黎干絲蟻和蘭西荷蘭大小西洋各國和蘭西最兇很與澳門種人同派習廣東情事請敕督撫關差諸臣防備於未入港之先取其火礮另設所關束每年不許多船並集下兵部但令沿海將吏晝夜防衛寢昂議倫爛爲侍衛時聖祖嘗召詢互市諸國事對悉與圖籍合時互市諸國奉約束惟謹獨昂倫爛父子有遠慮憂之最早云

歐陽凱福建漳浦人起行伍累官江南蘇松水師營總兵康熙五十七年調福建臺灣鎮以功加左都督六十年朱一貴作亂官軍遇賊於赤山千總陳元戰死賊進攻鳳山把總林富戰死守備馬定國自殺凱率所部守備胡忠義千總蔣子龍把總林彥禦之春牛埔參將羅萬倉遊擊孫文元城守遊擊許雲守備游崇功千總趙奇奉林文煌把總李茂吉率水師來會力戰破賊次日賊大至

凱力戰與忠義子龍彥俱沒於陣賊截凱首去雲崇功奇奉文煌同日戰死茂吉被執不屈死賊陷府治萬倉戰死文元奔鹿耳門投海死同死者游擊王九人守備吳泰嵩又有把總石琳自汀州被檄至臺灣遇變被圍死之六月師克臺灣一貴既誅獲其黨黃殿等械送福州獄雍正元年二月賊破械斬關出至下渡尾都司閻威守備楊士虎逐捕殺數賊被創死先後議卹凱贈太子少保廕守備雲以下皆贈官予世職有差羅萬倉甘肅甯夏人官北路參將凱戰死賊攻府城萬倉督將卒登埤發大礮擊賊仆賊旗賊大至萬倉出城與戰踰溝墜馬賊以竹篙刺其喉猶揮刀殺賊乃死妾蔣聞報自經殉游崇功字仲嘉福建漳浦人材力雄健從總兵蔡元鎮襄陽補右營把總累遷福建長福營守備分防長樂縣濱海有磁澳賊艘所出沒崇功廉得狀以兵二百伏隘口入澳捕之賊棄舟登岸伏發擒十七人自是島澳肅清長樂水災崇功謁巡撫滿保請發粟平糶民食以濟調臺灣北路營守備巡緝外洋擒海賊陳阿尾等六十餘人遷水師游擊一貴作亂崇功方出洋巡哨聞報率兵還赴安平至則賊已熾

清史稿 卷六
崇功急登岸赴敵其婿蔡章琦叩馬請一過家門區處眷屬崇功不顧躍馬揮
衆殺賊甚衆五月朔賊數萬戰於春牛埔凱戰死崇功突圍衝擊馬被創遂歿
於陣章琦國子監生聞崇功戰沒赴海死

論曰國家承平久禁網疏闊官吏緣爲奸措克聚斂以取怨於民臺灣懸海外
一夫發難郡縣皆不守鎮將戰死滿保聞亂投袂即行世驃廷珍皆名將能盡
其材遂以成功有將將之略焉世驃上承煇廷珍下啟廷枚並爲將門致果克
敵謀勇兼之亮以裨佐効死不去繫民望勉入險禽渠先後繼廷珍後當干城
之任厥績懋哉

王紫綬

袁州佐

黎士宏

多宏安

佟國聘

王

繻 田呈瑞

張孟球

王紫綬字金章河南祥符人順治三年進士選庶吉士散館授編修乞養歸僑寓蘇門山中從孫奇逢講學居十有七年母歿服闋康熙十二年授江西贛南道副使吳三桂反贛南總兵劉進寶有謀略紫綬推誠結納預籌防禦既而江西降衆屯墾者相繼叛惟贛南尙未動紫綬與進寶謀閩粵反已見端贛南扼其間應援前朝故事設巡撫以資鎮攝申疆吏上請允之十四年賊勢益熾山寇蠭起鎮兵疲於奔命乃練鄉勇以輔之屢殺賊有功十五年巡撫白色純及進寶先後卒官參將周球領鎮兵三桂將高得捷韓大任據吉安餉道絕屬縣相繼陷大任屢致書勸降送僞署巡撫劄紫綬斬其使球以乏饜爲難紫綬集士商勸輸間架稅得白金四萬畀球饜以無缺鎮南將軍覺羅舒恕率禁旅下

廣東爲尙之信將嚴自明所敗兵退距贛州三十里自明約得捷由吉安會師夾擊紫綬薦降將許盛率所部漳州水兵五百人益師夜泅江斫賊營禁旅繼之擊敗自明得捷等勢孤不敢復窺贛鎮兵出勦土寇掠村民紫綬曰鄉民脅從若並以賊論贛南二府十六縣將無子遺戒鎮將毋妄發兵飭有司招撫分別留遣賑濟難民境內稍安乃規復萬安泰和兩縣自螺山間道達墨潭可登舟於是南昌道始通運饟銀十萬至又發附近倉穀贍軍人心大定巡撫佟國禎亦自間道至始知紫綬已擢浙江督糧道參政贛南久不通驛報大學士李蔚言於朝曰紫綬死守危疆三年於茲爲國惜才援而出之猶可大用故有是擢紫綬聞命泣下十六年上官察積弊嘆曰糧官不可爲也漕截減而軍困白折浮而民困吾安忍竭東南之澤而漁之一月卽引疾去迨開博學鴻詞科魏象樞以紫綬與湯斌同薦入試放還卒

袁州佐字左之山東濟甯人順治十二年進士授陝西乾州知州入爲工部員外郎遷郎中有清直聲胥吏不敢牟利時山陵工巨經費浩穰州佐曰民困極

矣寸縑尺縷皆閭閻膏血力清乾沒司焚帛省金錢鉅萬出爲陝西甘山道僉事青海蒙古諸部覲得大草灘爲牧地康熙九年偕提督張勇度地畫界堅拒寢其議自後青海蒙古諸部人不敢復窺邊歲協西甯餽運負載千里甘州民苦之州佐力請得罷甘州駐兵數千待饒急力爲籌備軍得宿飽十年遷直隸口北道參議地確民貧逋課積累倉儲歷歲侵漁耗蝕無算州佐請按籍覈實清宿蠹大吏懼以失察得罪陽蹇而陰沮之州佐擘畫盤錯致疾乞休未去官卒州佐在甘州久言邊境要害戰守狀原委覲然謂邊地民稀宜用開中法分河東鹽引三之一輸粟河西資軍食又宜簡練鄉勇拔置卒伍不待召募可坐收精銳時詔簡監司具才望者入爲卿貳州佐在選會卒未及用

黎士宏字媿曾福建長汀人少讀書山中二十年篤於孝友順治十一年舉順天鄉試授江西廣信府推官鋤強糾貪奸宄斂戢理讞牘脫無罪數百人時爲語曰遇黎則生署玉山縣事兵後城中草三尺不辨街巷居民纔三十二家士宏立學建治招集流亡墾田定賦民復舊業裁缺改授永新知縣政清獄簡與

民休息舊例二月開徵五月解其半士宏陳於上官曰縣小民窮二月寫租十石貸銀一兩三月可減至六石四月則三石請以四月開徵五月解展兩月之徵已爲窮民留數萬之糧布政使劉樾素寬仁即允之甲訴乙悔婚鄉俗婚書各裝爲卷書男女生辰兩造固隣舊女生辰所素悉僞爲卷爲證士宏先問媒證乙得甲聘禮若干行聘時有何客媒證出不意妄舉以對復問甲所對各異擘視卷軸竹猶青笑詰之曰若訂婚三載卷軸竹色猶新此非臨訟僞造者乎甲乃服罪縣吏左梅伯有叔富而無子梅伯糾賊劫殺之獲賊而梅伯逃士宏抵任叔妻哭訴陰迹梅伯匿安福勢宦家故緩詞曰此舊事前官不了余安能按之數月梅伯歸叔妻復訴置不問梅伯且出收叔遺產叔妻號於庭曰公號廉明今寬殺人者罪且占寡婦田何得爲廉明陽怒批其牘曰止問田土不問人命梅伯益自得赴縣訴理乃笑謂曰候汝三載矣批其牘曰止問人命不問田土梅伯遂伏法其善斷獄多類此考最擢陝西甘州同知復考最擢江南常州知府吳三桂亂起關隴震動大吏疏請擢洸西道副使未到官而洸岷陷邊

外羣番乘亂內犯肆剽掠調署甘山道王輔臣叛河東失守士宏以兵集當謀帥言於巡撫謂恢復河東非用河西兵不可用河西兵非責之提督張勇不可疏入授勇靖逆將軍節制諸鎮復蘭州士宏贊畫功爲多署甘肅按察使按失守官吏罪務平允甯夏兵叛殺提督陳福調甯夏道嚴守禦安反側免衛所逋糧七萬五千石康熙十六年寇平以功進布政使參議母老乞歸家居幾三十年卒年八十一士宏備兵甘山時取晉辛憲英語軍旅之間可以濟者惟仁與恕因以名其堂

多宏安字君修直隸阜城人順治五年選拔貢生康熙初授廣東靈山知縣兵後荒殘居無衙舍宏安請免積年逋賦招撫流移捐給牛種民得安耕稼葺城垣創學宮繕官廨捕除盜賊靈山大治士民刊石紀其績七年遷奉天承德知縣旗民抗法者送部懲治皆懾服十年擢陝西延安靖邊同知十六年補江南淮安山盱河務同知時高堰長隄潰決淮水注寶應高郵不復出清口敵黃黃水直注裏河運道淤淺復隨淮入堰無由會清口下雲梯關入海近海口盡淤

墊宏安與河督靳輔籌策築高堰束淮敵黃治爛泥淺諸故道導清水入裏河運道乃通修築兩岸及清口清江大閘與淮工相表裏清河達雲梯關數百里葭葦榛蕪壅塞故道用以水攻沙法塞周橋高澗諸閘使清淮無旁洩蓄全力攻積沙十七年大雨淮盛漲與黃並入海治淮治黃治運並收成效十九年擢淮安知府二十年擢淮揚道二十四年擢安徽按察使時方議浚下河治高堰宏安入覲疏陳高堰宜急治無論下河開浚與否治堰法砌石先安地釘湖底水深費帑甚繁如用板若掃水勢蕩掣尤易摧殘惟密釘排椿內實以碎石庶可敵風浪省金錢十餘年後黃河刷深則湖河水俱卑高堰既固下河亦漸就理二十八年遷江西布政使乞歸後值黃運兩河潰溢起用宏安會病卒祀靈山名宦佟國聘字君莘奉天人以廕生補吏部筆帖式康熙十年授江南陽山知縣縣當黃河衝研求治河方略擢歸仁隄同知調宿桃同知擢貴州平遠知府河督靳輔疏留任十餘年倚如左右手塞楊家莊蕭家渡決口建朱家堂溫家廟二石壩浚白洋引河九道築黃河南北兩岸隄浚中河靡役不從久之擢

山東濟甯道副使道地爲漕運樞紐恤夫役減苛稅除冗費能舉其職復調監督高堰工程三十八年卒於官

王繻字慎夫河南睢州人少學於湯斌康熙二十五年以歲貢生授直隸東明知縣糧賦多欺隱易甲長大戶使族長督之飛灑不行流亡來歸民間養官馬爲累力除之撫盜魁責以緝捕盜絕跡逃人誣攀良民雪之民有繼妻素淫欲併亂前妻女不從戕之死繻謂母道絕當故殺妻前夫子律論斬報可因著爲例母憂去服闋補獲鹿治驛有法民不累於供億內遷戶部員外郎擢郎中三十八年出爲江南糧儲道道舊有倉規銀鉅萬繻一擯勿取將徵漕扁舟行縣懲其濫收者至宜興宜興民曰吾民四十年不見糧道今飛來耶號曰飛糧道道庫歲收銀八十五萬兩爲修船及弁丁運費運丁預支行糧例扣月息丁益困繻悉罷之四十年擢江蘇按察使治獄仁恕多所平反宿州生携妻子出客授妻兄女來視居數日妻子並中毒死妻兄素有隙疑其女置毒告官被刑誣服繻疑之問其室來往復何人得十二歲學徒畏師嚴置礮食中狀事乃白無

錫民毆攻皮匠匠死僧與民仇證爲鬪毆殺繻察鬪毆日月在保辜限外詰曰傷重何不醫出醫方則匠死於傷寒僧乃服上南巡入覲顧宋犖曰朕聞繻督糧時官聲甚好時繻已病遣御醫視之賜德里雅噶藥一器溫旨慰諭復賜御書繻曰按察任大責重臥治即辜恩引疾歸年甫五十久之卒於家田呈瑞字介璞山西汾陽人康熙中仕爲中書舍人出襄南河事有隄當水衝曰此隄一壞萬家其魚矣土隄易修易敗宜更以石家素豐出私錢成之以功擢大名道未之任調陝西臨洮道遇饑治賑策馬行郡縣山谷間豪右胥吏不敢爲奸弊呈瑞念救荒無善策於蘭州西石佛灣鑿渠教民造水車引以溉田歲增粟十餘萬石民爲建生祠調浙江金衢嚴道署糧儲道徵漕積弊盡洗滌之值旱冒暑省荒感疾乞歸不得五十九年卒於官

張孟球字夔石江南長洲人康熙二十四年進士授山東昌樂知縣入爲工部主事累遷禮部郎中出督雲南學政父憂去服闋補福建糧驛道駐防軍食取給於漕上游四郡阻灘險故事征解折色官爲採置輒抑勒病商孟球於延建

產米地平價購米餽民船運省城不假吏胥諸弊盡絕地多山嶺官吏濫用驛夫孟球禁革私冒遇大徭預期發雇值終其任無擾驛者調河南糧儲道河南漕糧就衛輝水次收兌舊無倉廩又無額役運船調之他省天寒水涸糧不時至宿河干以待遇雨雪則米濕霉變又患盜竊孟球始以羨餘建倉署布政使西藏用兵調河南馬騾萬凡騾馬三需一夫剋期兩月孟球止宿郊外躬自檢閱西路近陝諸郡遣吏往督之盡除需索留難諸弊凡五十四日馬驢如數遣赴軍而民不擾擢按察使蘭陽民朱復業附白蓮教自稱明裔煽惑數縣孟球檄杞縣知縣甯君佐馳往捕治盡獲其黨上命尙書張廷樞往按從孟球議誅其與逆謀者愚民被誘悉釋之浙川營兵博知縣崔錫執而罪之兵譁執南陽知府沈淵衆辱之總兵高成不能治時巡撫張聖佐坐譴孟球護巡撫曰南陽地連襄鄖急則鋌而走險事未可知密令附近諸縣嚴守禦諭止誅首惡自首免罪得倡亂者七人誅之不數日而事定康熙末乞歸不復出乾隆初卒年八

論曰官監司卓卓有名氏即平進至督撫易耳如紫綬等皆早退遂以監司終紫綬崎嶇兵間捍偏隅爲民保障州佐士宏勤勤重民事宏安贊治河繻善斷獄孟球能應變使得爲督撫其績效當有大於是者時方承平仕得行其意知止知足必有說以自處矣

清史稿

列傳七十三

王揆

子奕清

奕鴻

勞之辨

朱天保

陶彝

任坪 允鏞

范長發 高粉

鄒圖雲 高怡

陳嘉猷 趙成燠

王允晉 孫紹曾

李允符 邵璿

王揆字藻儒江南太倉人明大學士錫爵孫康熙九年進士選庶吉士授編修為掌院學士熊賜履所器遷左贊善充日講起居注官以病告八年起右贊善提督浙江學政嚴剔積弊所拔多宿學寒峻龍泉知縣茅國璽以印揭薦武童揆疏劾國璽坐譴別疏陳剔除積弊報聞累遷侍讀學士三十年超擢內閣學士三十三年遷戶部侍郎直經筵三十八年調吏部禁革臨選駁查臨掣買籤諸弊銓政以肅借尙書范承勳王鴻緒督修高家堰河工四十二年擢刑部尙書刑部奏讞無漢字供狀揆言本朝官制兼設滿漢欲其彼此參詳今獄詞不錄漢語是非曲直漢司官何由知之若隨聲畫諾幾成虛設嗣後定讞當滿漢

稿並具詔報可著爲令累厯工兵禮諸部務總紀綱持大體五十一年授文淵閣大學士兼禮部尙書直經筵如故五十二年典會試其冬以疾疏辭閣務溫旨慰留越年春疾愈仍入直孝惠章皇后祔太廟議者欲祔於孝康章皇后之次揆曰孝康章皇后雖母以子貴然孝惠章皇后章皇帝嫡配也上聖孝格天曩者太皇太后祔廟時不以躋孝端文皇后之上今肯以孝康章皇后躋孝惠章皇后上乎禮部不從上果以爲非令改正時上春秋高皇太子允礽旣廢儲位未定揆年七十餘自念受恩深又以其祖錫爵在明神宗朝以建儲事受惡名欲幹其蠱五十六年密奏請建儲疏入留中是年冬御史陳嘉猷等八人復以爲言上不悅遂并發揆疏命內閣議處忌揆者欲置重典揆止宮門外不敢入上顧左右問王揆何在李光地奏揆待罪宮門上曰王揆言甚是但不宜令御史同奏蹈明季惡習汝等票擬處分太重可速召其來揆聞命趨入免冠謝上招揆跪御榻前語良久祕人不能知六十年春羣臣請賀萬壽上勿許揆復疏前事請釋二阿哥語加激切旣而御史陶彝等十二人連名入奏上疑出揆

意大怒召諸王大臣降旨責揆植黨希榮且謂錫爵在明神宗時力奏建儲泰昌在位未及數月天啟庸懦天下大亂至愍帝而不能守明之亡錫爵不能辭其罪揆以朕爲神宗乎朕初無誅大臣之意大臣自取其死朕亦無如何令王大臣傳旨詰揆令回奏時舉朝失色無敢與筆硯者揆就宮門階石上裂紙以唾濡墨奏言臣伏見宋仁宗爲一代賢君而晚年立儲猶豫其時名臣如范鎮包拯等皆交章切諫鬚髮爲白臣愚信書太篤妄思效法古人實未嘗妄嗾臺臣共爲此奏奏上越五日詔緩議罪與諸御史俱赴西陲軍前效力因揆年老責其子奕清代往爲父贖罪先是揆嘗密奏請減蘇松浮糧言至剴切疏久留中至是忤旨乃與建儲奏疏一並擲還是年冬上自熱河還京師揆迎駕石槽上望見遣內侍慰問六十一年元旦諸大臣表賀未列揆名上發表命列名以進翌日賜宴太和殿再召見西煖閣賜坐慰諭有加尋起原官視事如故雍正元年以老乞休世宗降旨褒嘉以原官致仕仍留京師備顧問三年上諭閣臣云王揆向人言曾在聖祖前奏免蘇松浮糧未蒙允行朕查閱宮中並無此奏

因責挾藉事沽名並涉其子奕清奕鴻諂附年羹堯曰爲姦巧乃遣奕鴻與奕清同在軍前效力六年挾卒年八十四乾隆二年奕清始請卹於朝賜祭葬如制奕清字幼芬康熙三十年進士選庶吉士歷官詹事代父赴軍歷駐忒斯阿達拖羅海奕清體羸善病處之晏然雍正四年命赴阿爾泰坐臺又十年乾隆元年召還仍以詹事管少詹事乞假葬父尋卒奕鴻字樹先康熙四十八年進士授戶部主事歷湖南驛鹽糧儲道奕清赴軍奕鴻盡斥其產與俱後命赴烏里雅蘇臺效力居邊十年與奕清同釋還官四川川東道引疾歸卒

勞之辨字書升浙江石門人康熙三年進士選庶吉士授戶部主事遷禮部郎中出爲山東提學道僉事報滿左都御史魏象樞特疏薦之遷貴州糧驛道參議師方下雲南羽書旁午之辨安設驛馬以利塘報復以軍米運自湖南苦累夫役白大府停運就地採購供億無匱二十四年擢通政使參議遷兵部督捕理事官連遭親喪服闋起故官海擢左副都御史數有建白四十七年皇太子允礽既廢上日夕憂懣既有復儲意王大臣合疏保奏命留中旋諭廷臣俟廢

太子疾瘳教養有成朕自有旨諸王大臣不得多瀆十二月之辨密奏曰皇上之於皇太子分則君臣親則父子皇太子初以疾獲戾今疾已平復孝友之本懷固由至性肅雍之儀表久繫羣心乞速渙新綸收回成詔敕部擇吉早正東宮布告中外俾天下曉然知聖人舉動仁至義盡大公無私事莫有重於此者今八荒清晏一統車書值星紀初週光華復旦七廟將行大祐萬國於以朝正皇上以孝慈治天下方且稱壽母萬年之觴集麟趾繁昌之慶而顧使前星虛位震子未甯聖心得無有遺憾乎臣年已七十報主之日無多知無不言統望乾斷速行自此以往皇上待皇太子與諸皇子尤願均之以恩範之以禮則宜君宜王之美不難上媿成周遠超百代至萬不得已而裁之以法則非臣之所敢言也疏入上不懌斥爲奸詭命奪官逮赴刑部笞四十逐回原籍五十一年赴京祝萬壽復原秩逾年卒於家

朱天保字九如滿洲鑲白旗人兵部侍郎朱都訥子康熙五十二年進士選庶吉士授檢討五十六年典山東鄉試五十七年正月疏請復立二阿哥允礽爲

皇太子時允祔廢已久儲位未定貝勒允禩覬得立揆敍王鴻緒等左右之欲
陰害允祔朱天保憂之具疏上略曰二阿哥雖以疾廢然其過失良由習於驕
抗左右小人誘導之故若遣碩儒名臣爲之羽翼左右佞幸盡皆罷斥則潛德
日彰猶可復問安侍膳之歡儲位重大未可移置如基恐有藩臣傍爲覬覦則
天家骨肉之禍有不可勝言者疏成以父在慮同禍徘徊未即上朱都訥察其
情趣之入告時上方幸湯山朱天保早出德勝門羣鴉阻馬前朱天保揮之去
疏上上欬歔久之阿靈阿允禩黨也媒孽之曰朱天保爲異日希寵地上怒於
行宮御門召問曰爾云二阿哥仁孝何由知之朱天保以聞父語對上曰爾父
在官時二阿哥本無疾學問弓馬皆可觀後得瘋疾舉動乖張嘗立朕前辱罵
徐元夢於伯叔之子往往以不可道之言肆詈爾知之乎爾又云二阿哥聖而
益聖賢而益賢爾從何而知朱天保亦以父聞之守者對詰其姓名不能答上
曰朕以爾陳奏此大事遣人傳問或將爾言遺漏故親訊爾爾無知稚子數語
即窮必有同謀者朱天保對父與婿戴保同謀遂逮朱都訥戴保上復御門召

問曰二阿哥因病拘禁朕猶望其痊愈故復釋放父子相見教訓不悛始復拘禁二阿哥以礮水作書與普奇屬其保舉爲大將軍並謂齊世札拉克圖皆當爲將軍朕遣內侍往詢自承爲親筆此事爾知之否朱都訥自稱妄奏應萬死上曰爾奏引戾太子爲比戾太子父子間隔朕於二阿哥常遣內監往視賜食賜物今二阿哥顏貌豐滿其子七八人朕常留養宮中何得比戾太子爾又稱二阿哥爲費揚古陷害費揚古乃功臣病篤時朕親臨視沒後遣二阿哥往奠爾何得妄言爾希僥倖取大富貴以朕有疾必不親訊今爾始知當死乎辭連朱都訥婿常賚及金寶齊世萃泰等並逮訊議罪朱天保戴保皆坐斬朱都訥與常賚金寶皆免死荷校齊世拘禁萃泰奪官

陶彝順天大興人康熙三十九年進士授戶部主事再遷郎中考選廣西道御史巡視兩浙鹽政六十年三月彝與同官任坪范長發鄒圖雲陳嘉猷王允晉李允符范允鏞高玠高怡趙成穰孫紹曾合疏奏曰皇上深恩厚德浹洽人心茲逢六十年景運方新普天率土歡欣鼓舞而建儲一事尤爲鉅典懇獨斷宸

衷早定儲位疏入下內閣時大學士王掞正密疏請建儲後數日彝等疏又上
上震怒斥掞植黨希榮於是王大臣奏請奪掞及諸御史官從重治罪越日諭
廷臣曰王掞及御史陶彝等妄行陳奏俱稱爲國爲君今西陲用兵爲人臣者
正宜滅此朝食可暫緩議罰如八旗滿洲文官例俱委署額外章京遣往軍前
效力贖罪雍正四年世宗以諸御史不諳國體心本無他詔釋歸以原職休致
還籍坪字坦公山東高密人康熙三十年進士自刑部郎中考選山西道御史
轉掌陝西道赴軍駐忒斯河大漠荒寒盛夏冰雪坪處之怡然及歸閉戶讀書
終老於家長發字廷舒浙江秀水人康熙三十三年進士授南城知縣行取禮
部主事考選廣西道御史轉掌浙江道遣戍予額外主事銜隨都統圖臘赴征
西將軍營還駐歸化城後命赴察漢新臺歸以原職休致圖雲字偉南江西南
城人康熙三十六年進士授大竹知縣行取禮部主事考選河南道御史轉掌
山東道巡視東城嘉猷字詎叔江南溧陽人康熙三十九年進士自吏部員外
郎考選山西道御史五十六年王掞密請建儲未幾嘉猷與同官八人亦合疏

陳請上疑之掞幾獲罪事具掞傳至是嘉猷復與彝等申請獲咎允晉直隸清苑人康熙四十五年進士自戶部員外郎考選陝西道御史允符字揆山浙江嘉善人康熙二十六年舉人授什邡知縣行取江西道御史允鏞字用賓浙江錢塘人康熙三十九年進士授安平知縣行取工部主事考選山東道御史玠字荆襄河南柘城人康熙二十七年進士自禮部郎中考選廣東道御史巡視東城謫戍忒斯軍營運糧西藏居塞上六年著出塞集備言屯戍之苦釋歸終於家怡字仲友浙江武康人康熙二十七年進士授長洲知縣善聽訟吏胥憚之尙書韓菼怡師也其姻黨繫獄以菼故請恕怡怒杖之遷鄞州知州行取工部主事考選山東道御史謫戍時年逾六十以原職釋歸成穰字德培江南吳縣人康熙四十七年舉人授內閣中書累遷兵部郎中考選福建道御史紹曾字二乾浙江山陰人康熙二十五年舉人授開縣知縣行取戶部主事授四川道御史赴軍駐歸化城地當孔道故事徭役供張取給於戍員紹曾清介無餘資困甚迨釋還卒於途又有邵璿亦以疏請建儲獲罪璿字璣亭江南無錫人

自拔貢生授芮城知縣行取工部主事授江南道御史掌登聞院巡視北城六十年遣戍軍前時同謫者十三人圖雲允符成穰璿皆死於塞外而給事中劉堂御史柴謙吳鎬程鑣續以言事謫同時釋還仍爲十三人世稱十三言官堂彭澤人謙仁和人鎬漢陽人鑣錢塘人

論曰理密親王在儲位久未聞顯有失德而終遭廢黜聖祖手詔若有深痛鉅慝至不可言者夫以聖祖之仁明而不克全監撫之重終父子之恩讒人罔極靡所不至甚矣揆力主復故聖祖雖深罪之固諒其無他心勞之辨諫於初廢大臣拜杖已非故事朱天保爭於再黜遂以誅死罪及其親一則但責其沽名一則深疑其受指故譴有重輕歟彝等但坐謫戍已爲寬典拳拳效忠固人臣之義也

清史稿

列傳七十四

佟國維

馬齊

子富良馬齊弟馬武馬武子保祝

阿靈阿

子阿爾松阿

揆敘

鄂倫岱

佟國維滿洲鑲黃旗人佟國賴次子孝康章皇后幼弟孝懿仁皇后父也順治

間授一等侍衛康熙九年授內大臣吳三桂反子應熊以額駙居京師謀為亂

以紅帽為號國維發其事命率侍衛三十人捕治獲十餘人械送刑部誅之二

十一年授領侍衛內大臣議政大臣二十八年推孝懿仁皇后恩封一等公二

十九年師征噶爾丹命參贊大將軍裕親王軍務次烏蘭布通與兄都統國綱

並率左翼兵進戰國綱戰沒國維自山腰出賊後擊之潰遁師還以未窮追部

議當奪官命罷議政大臣鐫四級留任三十五年從上征噶爾丹出獨石口以

駝運稽遲請罪上貫之三十六年復從上征噶爾丹竄死敘功還所鐫

級四十三年以老解任四十七年皇太子允祜以病廢幽禁上鬱怒成疾國維

奏皇上治事精明斷無錯誤此事於聖躬關係甚大請度日後若易於措置祈速賜睿斷若難於措置亦祈速賜睿斷總之將原定意指熟慮施行爲是上命諸大臣保奏諸皇子中孰可爲皇太子者諸大臣舉皇子允禩上愈不懌旋以皇太子病愈命釋之四十八年正月召諸大臣詰孰先舉允禩實出大學士馬齊上召國維舉國維前奏語問爾旣解任事與爾無與乃先衆陳奏何意國維對臣雖解任蒙皇上命爲國舅冀聖躬速愈故請速定其事上曰將來措置難易至時自知之人其可懷私而妄言乎次日復諭曰爾每言祝天求佛願皇上萬歲嗣後惟深念朕躬謂諸皇子皆吾君之子不有所依附而陷害其餘是即俾朕易於措置也閱月上巳定復立允禎爲皇太子又諭曰爾乃國舅又爲大臣皇太子前染風疾朕爲國家計安可不行拘執後知爲人鎮壓調治全愈又安可不行釋放朕拘執皇太子時並無他意不知爾肆出大言激烈陳奏果何心也諸大臣聞爾言衆皆恐懼遂欲立允禩爲皇太子列名保奏朕臨御已久安享太平並無所謂難措置者臣庶亦各安逸得所今因爾言羣小復肆爲妄

語諸臣俱終日憂慮若無生路此事關係甚重爾既有此奏必有確見其何以令朕及皇太子諸皇子不致殷憂衆心亦可定其明白陳奏國維引罪請誅戮上復諭曰朕特爲安撫羣臣非欲有所誅戮爾初陳奏衆方贊爾謂如此方可謂國家大臣今爾情狀畢露人將謂爾爲何如人朕斷不加爾誅戮爾其無懼但不可卸責於朕觀爾言迷妄其亦爲人鎮魘歟五十八年卒賜祭葬雍正元年贈太傅諡端純世宗手書仁孝勤恪勝命表於墓道子隆科多自有傳

馬齊富察氏滿洲鑲黃旗人米斯翰子由廕生授工部員外郎歷郎中遷內閣侍讀學士康熙二十四年出爲山西布政使擢巡撫馬齊入覲上褒其居官勤慎勉以始終如一久之上命九卿舉督撫清廉如于成龍者以馬齊及范成勳姚締虞對尋命偕成龍開音布往按湖廣巡撫張汧貪黷狀初命侍郎色楞額往按上荆南道祖澤深並令察汧色楞額曲庇不以實陳馬齊與成龍覆按具得汧澤深貪墨狀並色楞額論罪如律二十七年遷左都御史時俄羅斯遣使請定界詔遣大臣往議馬齊疏言俄羅斯侵據疆土我師困之於雅克薩城本

可立時勦滅皇上寬容不忍加誅今悔罪求和特遣大臣往議垂之史冊關係甚鉅其檔案宜兼書漢字使臣并參用漢員詔如議行尋命偕尙書張玉書等勘閱河工二十九年列議政大臣都御史與議政自馬齊始尋遷兵部尙書時喀爾喀諸部避噶爾丹侵掠舉族內嚮詔沿邊安插命馬齊偕侍郎圖布等先期檄左右翼部長至上都河額爾屯河兩界以待上出塞喀爾喀諸部朝行在定諸王貝子公等爵秩牧地烏珠穆沁台吉車根等叛附噶爾丹命馬齊往按寘諸法調戶部尙書三十年上親征噶爾丹命馬齊檄喀喇沁翁牛特兵備戰還京師兼理藩院尙書噶爾丹旋敗遁詔來春復親出塞命先期往甯夏安置驛站三十八年授武英殿大學士賜御書永世翼戴榜四十七年冬皇太子允禩既廢儲位未定佟國維奏請速斷上召滿漢文武諸大臣集暢春園議諸皇子中孰可爲皇太子者上意在復立皇太子而諸皇子中貝勒允禩覬爲皇太子最力諸大臣揆敘王鴻緒及佟國綱子鄂倫岱等爲之羽翼集議日馬齊先至張玉書後入問衆意誰屬馬齊言衆有欲舉八阿哥者俄上命馬齊毋預議

馬齊避去阿靈阿等書八字密示諸大臣諸大臣遂以允禩名上上不憚明年正月召諸大臣問其日先舉允禩者爲誰羣臣莫敢對上嚴詰羣指都統巴琿岱上曰是必佟國維馬齊意也馬齊奏辨巴琿岱言漢大臣先舉上以問大學士張玉書玉書乃直舉馬齊語以對上曰馬齊素謬亂如此大事尙懷私意謀立允禩豈非爲異日恣肆專行計耶馬齊復力辨辭窮先出翌日上諭廷臣曰馬齊效用久朕意欲保全之昨乃拂袖而出人臣作威福如此罪不可赦遂執馬齊及其弟馬武李榮保下獄王大臣議馬齊斬馬武李榮保坐罪有差盡奪其族人官上不忍誅命以馬齊付允禩嚴錮李榮保馬武並奪官四十九年俄羅斯來互市上念馬齊習邊事令董其事李榮保馬武皆復起尋命馬齊署內務府總管五十五年復授武英殿大學士世宗即位降敕褒諭予一等阿達哈哈番尋命襲其祖哈什屯一等阿思哈尼哈番進二等伯加太子太保雍正元年改保和殿進太保三年復降詔褒其忠誠加拜他喇布勒哈番以其子富良襲十三年引疾乞罷許致仕乾隆四年病篤高宗諭謂馬齊歷相三朝年逾大

清史稿
三
臺舉朝大臣未有及者命和親王及皇長子視疾尋卒年八十八贈太傅諡文
穆子富興襲爵坐事黜以富良襲進一等伯十五年加封號曰敦惠富良自散
秩大臣授鑾儀衛鑾儀使累遷西安將軍兼領侍衛內大臣卒諡恭勤馬武馬
齊弟初授侍衛兼管佐領累擢鑾白旗漢軍副都統因馬齊得罪奪官旋起內
務府總管遷鑾白旗蒙古都統世宗即位授領侍衛內大臣雍正四年卒命視
伯爵賜卹授三等阿達哈哈番賜祭葬諡勤恪馬武子保祝初授侍衛累遷直
隸提督以病解任起正紅旗蒙古都統卒諡恭簡

阿靈阿鈕祜祿氏滿洲鑲黃旗人遏必隆第五子初任侍衛兼佐領康熙二十
五年襲一等公授散秩大臣擢鑲黃旗滿洲都統阿靈阿女兄上册爲貴妃貴
妃薨殯朝陽門外阿靈阿舉家在殯所持喪與兄法喀素不睦欲致之死乃播
蜚語誣法喀法喀以聞上震怒奪阿靈阿職仍留公爵尋授一等侍衛累遷正
藍旗蒙古都統擢領侍衛內大臣理藩院尙書四十九年與揆敘王鴻緒等密
議舉允禩爲皇太子上以馬齊示意諸大臣予嚴譴不復窮治興大獄五十五

年卒子阿爾松阿降襲二等公擢領侍衛內大臣刑部尙書雍正二年世宗召諸大臣諭曰本朝大臣中居心奸險結黨營私惟阿靈阿揆敘爲甚當年二阿哥之廢斷自聖衷豈因臣下蜚語遂行廢立乃阿靈阿揆敘攘爲己力要結允禩等造作無稽之言轉相傳播致皇考憤懣莫可究詰阿靈阿子阿爾松阿柔奸狡猾甚於其父令奪官遣往奉天守其祖墓並將阿靈阿墓碑改鐫不臣不弟暴悍貪庸阿靈阿之墓以正其罪四年命誅阿爾松阿妻子沒入官乾隆元年以阿靈阿墓碑立祖塋前墓已遷而碑尙存命去之妻子釋令歸旗

揆敘字凱功納喇氏滿洲正黃旗人大學士明珠子康熙三十五年自二等侍衛授翰林院侍讀充日講起居注官累擢翰林院掌院學士兼禮部侍郎奉使册封朝鮮王妃尋充經筵講官教習庶吉士遷工部侍郎初明珠柄政勢焰薰灼大治園亭賓客滿門下揆敘交游旣廣尤工結納素與允禩相結皇太子旣廢揆敘與阿靈阿等播蜚語言皇太子諸失德狀杜其復立四十七年冬上召滿漢大臣問諸皇子中孰可爲皇太子者揆敘及阿靈阿鄂倫岱王鴻緒等私

與諸大臣通消息諸大臣遂舉允禩事具馬齊傳五十一年遷左都御史仍掌翰林院事疏言近聞外省塘報故摭拾大小事件名曰小報駭人耳目請飭嚴禁庶好事不端之人知所做懼詔允行五十六年卒諡文端雍正二年發揆敘及阿靈阿罪狀追奪揆敘官削諡墓碑改鑄不忠不孝陰險柔佞揆敘之墓鄂倫岱滿洲鑲黃旗人佟國綱長子初任一等侍衛出爲廣州駐防副都統康熙二十九年擢鑲黃旗漢軍都統襲一等公三十五上年親征噶爾丹鄂倫岱領漢軍兩旗火器營出古北口扈蹕北巡塞外三十六年擢領侍衛內大臣坐事降一等侍衛尋授散秩大臣四十六年復授領侍衛內大臣五十九年命出邊管蒙古驛站世宗立召還授正藍旗漢軍都統雍正三年諭曰鄂倫岱與阿靈阿皆黨於允禩當日允禩得罪皇考時方駐蹕遙亭命執允禩門下宦者刑訊具言鄂倫岱等黨附狀鄂倫岱等色變不敢置辨四十九年春皇考自霸州回鑾途中責鄂倫岱等結黨鄂倫岱悍然不顧又從幸熱河皇考不豫鄂倫岱日率乾清門侍衛較射游戲皇考於行圍時數其罪命侍衛鞭撻之鄂倫岱頑

悍怨望雖置極典不足蔽辜朕念爲皇祖妣皇妣之戚父又陳亡不忍加誅令往奉天與阿爾松阿同居四年與阿爾松阿並誅仍諭不籍其家不沒其妻子子補熙自廢生授理藩院員外郎襲國綱拜他喇布勒哈番世職官至綏遠城將軍卒諡溫僖

論曰理密親王既廢自諸皇子允禔允禩輩及諸大臣多謀擁允禩聖祖終不許誠以儲位至重非可以覬覦攘奪而致也佟國維陳奏激切意若不利於故皇太子語不及允禩而意有所在馬齊遂示意諸大臣然二人者皆非出本心聖祖諒之世宗亦諒之故能恩禮勿替賞延於後嗣若阿靈阿父子揆敘鄂倫岱王鴻緒固擁允禩最力者世宗既譴允禩諸臣生者被重誅死者蒙惡名將安所逃罪鴻緒又坐與徐乾學等比被論事別見故不著於此篇

...

...

...

...

...

...

...

...

...

...

...

...

...

鄂爾泰

弟鄂爾奇 子鄂弼 鄂壽

張廷玉

子若霽 若澄 若淳 從子若淮

鄂爾泰字毅庵西林覺羅氏滿洲鑲藍旗人世居汪欽國初有屯泰者以七村

附太祖授牛彖額眞子圖捫事太宗從戰大凌河擊明將張理陳沒授備禦世

職雍正初祀昭忠祠鄂爾泰其曾孫也康熙三十八年舉人四十二年襲佐領

授二等侍衛從聖祖獵和詩稱旨五十五年遷內務府員外郎世宗在藩邸偶

有所屬鄂爾泰拒之世宗即位召曰汝爲郎官拒皇子其執法甚堅深慰諭之

雍正元年充雲南鄉試考官特擢江蘇布政使於廨中建春風亭禮致能文士

錄其詩文爲南都耆獻集以應得公使銀買穀三萬三千四百石有奇分貯蘇

松常三府備賑貸察太湖水利擬疏下游吳淞白茆役未舉三年遷廣西巡撫

甫上官調雲南以巡撫治總督事貴州種家苗爲亂二十餘年巡撫石禮哈提

督馬會伯請用兵上未即許巡撫何世璜疏言種家苗藥箭鈹利地勢險阻用

兵不易上卽命世璠招撫久未定詔諮鄂爾泰四年春疏言雲貴大患無如苗蠻欲安民必制夷欲制夷必改土歸流而苗疆多與鄰省相錯卽如東川烏蒙鎮雄皆四川土府東川距雲南四百餘里去冬烏蒙攻掠東川滇兵擊退而川省令箭方至烏蒙距雲南省城亦僅六百餘里錢糧不過三百餘兩取於下者百倍一年四小派三年一大派小派計錢大派計兩土司娶子婦土民三載不敢婚土民被殺親族尙出墊刀數十金終身不見天日東川雖已改流尙爲土目盤據文武長寓省城膏腴四百里無人敢墾若改隸雲南俾臣得相機改流可設三府一鎮此事連四川者也廣西土府州縣峒寨等一百五十餘員分隸南甯太平思恩慶遠四府其爲邊患自泗城土府外皆土目橫於土司黔粵以牂牁江爲界而粵屬西隆州與黔屬普安州越江互相斗入苗寨寥闊將吏推諉應以江北歸黔江南歸粵增州設營形格勢禁此事連廣西者也滇邊西南界以瀾滄江江外爲車里緬甸老撾諸境其江內鎮沅威遠元江新平普洱茶山諸夷巢穴深邃出沒魯魁哀牢間無事近患腹心有事遠通外國論者謂江

外宜土不宜流江內宜流不宜土此雲南宜治之邊夷也貴州土司向無鉗束羣苗之責苗患甚於土司苗疆四圍幾三千餘里千三百餘寨古州踞其中羣寨環其外左有清江可北達楚右有都江可南通粵蟠據梗隔遂成化外如欲開江路通黔粵非勒兵深入徧加勦撫不可此貴州宜治之邊夷也臣思前明流土之分原因煙瘴新疆未習風土故因地制宜使之鄉導彈壓今歷數百載以夷治夷即以盜治盜苗猥無追贓抵命之憂土司無革職削地之罰直至事上聞行賄詳結上司亦不深求以爲鎮靜邊民無所控訴若不剷蔓塞源縱兵刑財賦事事整理皆非治本改流之法計擒爲上兵勦次之令其自首爲上勒獻次之惟勦夷必練兵練兵必選將誠能賞罰嚴明將士用命先治內後攘外實邊防百世之利疏入上深然之會石禮哈疏報遣兵擊破谷隆長寨者貢羊城壘諸隘擒其渠阿革阿給及諸苗之從爲亂者上命交鄂爾泰按讞五月鄂爾泰遣兵三道入一自谷隆一自焦山一自馬落孔破三十六寨降二十一寨撫苗民五百餘戶二千餘口察出荒熟田地三萬畝又以鎮遠土知府刁澣霑

益土知州安於藩素凶詐計擒之者樂甸土司刁聯斗乞免死改土歸流鄂爾泰疏報種家苗悉定上嘉其成功速令議敘旋條上經理種苗諸事報可十月眞除雲貴總督四川烏蒙土司祿萬鍾爲亂侵東川鄂爾泰請以東川改隸雲南上從之仍命會四川總督岳鍾琪按治招其渠祿鼎坤出降鄂爾泰令鼎坤招萬鍾數往不就撫乃檄總兵劉起元率師討之破其所居寨萬鍾走匿鎮雄土司隴慶侯所五年萬鍾詣鍾琪降慶侯亦詣鍾琪請改土歸流上命鍾琪以萬鍾慶侯交鄂爾泰按讞敘功授世職拜他喇布勒哈番三月鎮沅裸刁如珍等戕官焚掠遣兵討平之獲汝珍泗城土知府岑映宸縱其衆出掠又發兵屯者相立七營鄂爾泰疏劾令諸道兵候檄進討映宸乞免死存祀改土歸流鄂爾泰請映宸送浙江原籍留其弟映翰奉祀七月發兵與湖北師會討定謬沖花苗獲其渠降其餘衆威遠裸札鐵匠等新平裸李百疊等應如珍爲亂九月鄂爾泰檄臨元總兵孫宏本率師討之獲札鐵匠降李百疊威遠新平皆定十一月招降長寨後路苗百八十四寨編戶口定額賦得旨嘉獎進世職一等阿

達哈哈番十二月攻破雲南猓窩泥種取六茶山地千餘里劃界建城置官吏雲南南徼地與安南接前總督高其倬疏言安南國界應屬內地者百二十里請以賭咒河爲界安南國王黎維禔奏辦上命鄂爾泰清察鄂爾泰請與地八十里於鉛廠山下小河內四十里立界上從之敕諭安南六年維禔表謝上嘉其知禮命復與四十里旋討擒東川法戛土目祿天佑則補土目祿世豪按治米貼土日程永孝論斬永孝妻陸氏結猓獯爲亂檄總兵張耀祖討之攻克門坎山師入獲陸氏米貼平廣西八達寨猓顏光色等爲亂提督田峻不能討鄂爾泰遣兵往獵殺光色以降上命鄂爾泰總督雲貴廣西三省發帑十萬犒師旋又撫貴州拜克猛長寨古羊等生苗百四十五寨十月萬壽節雲南卿雲見鄂爾泰疏聞七年正月命超授三等阿思哈尼哈番雲貴兩省巡撫提督總兵文知縣武千總以上皆加級三月令按察使張廣泗率師攻貴州丹江雞溝生苗破其寨種人悉降上下九股清水江古州諸地以次定下部議敘鄂爾泰疏辭而乞予曾祖圖捫封典俾昭忠祠位得改書贈官列大臣之末上允其請仍

命議敘七月招安順高耀等寨生苗及猥狃諸種人內附十月雲南趙州醴泉出鄂爾泰疏聞上褒鄂爾泰化民成俗格天致瑞尋加少保八年五月招黎平都勻等寨生苗內附鄂爾泰既討定羣苗爲亂者諸土司懾軍威納土疆理其地置郡縣設營汛重定三省及四川界域而諸土司世守其地一旦歸版籍其渠誅夷遷徙皆無倖屬苗內憤熯烏蒙裸最狡悍總兵劉起元移鎮其地恣爲貪虐六月祿鼎坤及其族人鼎新萬福遂糾衆攻城劫殺起元及游擊江仁知縣賽枝大等盡戕其孥鄂爾泰疏聞請罷斥上慰諭之烏蒙既陷江外涼山下方阿驢江內巧家營者家海諸寨及東川祿氏諸土目皆起而應之又令則補以址諸寨要截江路以則以擢諸寨窺伺城邑東川境內空泥矣氏歹補阿汪諸寨東川境外急羅箐施魯古牛畢古諸寨及武定尋甸威甯鎮雄所屬諸夷遠近嚮應殺塘兵劫糧運堵要隘毀橋樑所在屯聚爲亂鄂爾泰集官兵萬數千人土兵牛之分三路進攻令總兵魏翥國攻東川哈元生攻威甯副將徐成貞副之參將韓勳攻鎮雄翥國師行土目祿鼎明遣行刺被創以總兵官祿代

將師進焚苗寨十三遣游擊何元攻急羅箐殺三百餘降一百三十餘游擊紀龍攻者家海破寨盡殲其衆勳與苗兵遇於莫都戰一晝夜破寨四殺數百人進攻奎鄉戰三日殺二千餘元生成貞自威寧攻烏蒙射殺其渠黑寡暮來連破寨八十餘擊敗其衆數萬遂克烏蒙鄂爾泰檄提督張耀祖督諸軍分道窮搜屠殺剝腸截脰分懸崖樹間羣苗讐慄上獎鄂爾泰及諸將以元生成貞勳爲功首發帑犒師隴慶侯庶母二祿氏四川沙馬土婦沙氏以不從亂給誥命賚銀幣於是苗疆復定鄂爾泰令於雲貴界上築橋命曰庚戌橋以年紀其績也是歲永昌邊外孟連土司請歲納廠課六百鶴慶邊外怒子請歲貢土物鄂爾泰疏聞上以邊外野夷向化命減孟連廠課之半怒子入貢犒以鹽二百斤九年疏請重定烏蒙鎮遠東川威寧營汛別疏請興雲南水利濬嵩明州楊林海開墾周圍草塘疏宜良尋甸諸水耕東城北漫海築浪穹羽河諸隄修臨安諸處工暨通粵河道皆下部議行十年召拜保和殿大學士兼兵部尙書辦理軍機事務敘定苗疆功部議進世職一等精奇尼哈番上特命授一等伯爵世

襲師討準噶爾六月命鄂爾泰督巡陝甘經略軍務九月師破敵額爾德尼昭鄂爾泰檄大將軍張廣泗遣兵截袞塔馬哈戈壁斷敵北遁道尋疏請屯田十一年六月還京師入對言準部未可驟滅用兵久敝中國無益上頗然之十三年台拱苗復叛上命設辦理苗疆事務處以果親王寶親王和親王鄂爾泰及大學士張廷玉等董其事苗患日熾焚掠黃平施秉諸地鄂爾泰以從前布置未協引咎請罷斥並削去伯爵上曰國家錫命之恩有功則受無功則辭古今通義允其請予休沐仍食俸尋命留三等阿思哈尼哈番八月世宗疾大漸鄂爾泰仍以大學士與莊親王允祿果親王允禮大學士張廷玉內大臣豐盛額訥親海望同被顧命鄂爾泰與廷玉捧御筆密詔命高宗爲皇太子俄皇太子傳旨命鄂爾泰等輔政世宗崩宣遺詔以鄂爾泰志秉忠貞才優經濟命他日配享太廟高宗即位命總理事務進一等精奇尼哈番乾隆二年十一月辭總理事務授軍機大臣又辭兼管兵部上不許加拜他喇布勒哈番合爲三等伯賜號襄勤迭主會試充領侍衛內大臣議政大臣經筵講官四年南河河道總

督高斌請開新運口河東河道總督白鍾山請復漳河故道命鄂爾泰按視尋加太保七年副都御史仲永檀以密奏留中事告鄂爾泰長子鄂容安命王大臣會鞫請奪鄂爾泰官逮問上不許十年以疾乞解任上慰留加太傅卒命遵遺詔配享太廟並祀賢良祠賜祭葬諡文端二十年內閣學士胡中藻以詩辭悖逆獲罪中藻出鄂爾泰門下鄂爾泰從子甘肅巡撫鄂昌與唱和並坐譴上追咎鄂爾泰植黨命撤出賢良祠鄂爾泰弟鄂爾奇康熙五十一年進士改庶吉士散館授編修雍正中四遷至侍郎歷工禮二部署兵部五年擢戶部尙書兼步軍統領十一年直隸總督李衛論劾壞法營私紊制擾民諸狀鞫實當治罪上推鄂爾泰恩宥之十三年卒鄂爾泰子鄂容安鄂實鄂弼鄂甯鄂圻鄂謨鄂容安自有傳鄂實與高天喜同傳鄂弼初授三等侍衛遷正紅旗漢軍副都統出爲山西巡撫調陝西署西安將軍擢四川總督未上官卒賜祭葬諡勤肅鄂甯舉人初授戶部筆帖式屢以員外郎著副都統復自郎中擢禮部侍郎出爲湖北巡撫調湖南再調雲南師征緬甸雲南總督楊應琚戰失利鄂甯以實

疏聞明瑞代應琚深入戰死鄂寧劾參贊額勒登額提督譚五格逗遛失機上
獎鄂寧加內大臣銜即命代明瑞爲雲貴總督尋以與參贊舒赫德合疏議撫
失上指奪內大臣銜左授福建巡撫迭降藍翎侍衛卒

張廷玉字衡臣安徽桐城人大學士英次子康熙三十九年進士改庶吉士散
館授檢討直南書房以憂歸服除遷洗馬厯庶子侍講學士內閣學士五十九
年授刑部侍郎山東鹽販王美公等糾衆倡邪教巡撫李樹德令捕治得百五
十餘人上命廷玉與都統托賴學士登德會勘戮七人戍三十五人而讞定旋
調吏部世宗即位命與翰林院學士阿克敦勵廷儀應奉几筵祭告文字賜蔭
生視一品擢禮部尙書雍正元年復命直南書房偕左都御史朱軾充順天鄉
試考官上嘉其公慎加太子太保尋兼翰林院掌院學士調戶部疏言浙江衢
州江西廣信贛州毘連閩粵無藉之徒流徙失業入山種麻結棚以居號曰棚
民歲月既久生息日繁其強悍者輒出剽掠請敕督撫慎選廉能州縣嚴加約
束其有讀書向學膂力技勇察明考驗錄用庶生聚教訓初無歧視下督撫議

行命署大學士事四年授文淵閣大學士仍兼戶部尚書翰林院掌院學士五年進文華殿大學士六年進保和殿大學士兼吏部尚書七年加少保八年上以西北用兵命設軍機房隆宗門內以怡親王允祥廷玉及大學士蔣廷錫領其事嗣改稱辦理軍機處廷玉定規制諸臣陳奏常事用疏自通政司上下內閣擬旨要事用摺自奏事處上下軍機處擬旨親御硃筆批發自是內閣權移於軍機處大學士必充軍機大臣始得預政事日必召入對承旨平章政事參與機密廷玉周敏勤慎尤爲上所倚上偶有疾獎廷玉等翊贊功各予一等阿達哈哈番世襲廷玉請以子編修若靄承襲十一年疏言諸行省例凡罪人重者收禁輕者取保獨刑部不論事大小人首從皆收禁累無辜請如諸行省例得分別取保刑部引律例往往刪截但用數語即承以所斷罪甚有求其彷彿比照定議者高下其手率由此起請敕都察院大理院駁正扶同草率併予處分命九卿議行大學士英祀京師賢良祠復即本籍諭祭命廷玉歸行禮並令子若靄從弟廷璐督江蘇學政亦命來會發帑金萬爲英建祠並賜冠帶衣裘

及貂皮人參內府書籍五十二種十二月廷玉疏言行經直隸被水諸縣已予賑尙有積潦不能種麥請敕加賑一月並議以工代賑得旨允行十二年二月還京師上遣內大臣郎海望迎勞蘆溝橋賜酒膳十三年世宗疾大漸與大學士鄂爾泰等同被顧命遺詔以廷玉器量純全抒誠供職命他日配享太廟高宗卽位命總理事務予世職一等阿達哈哈番合爲三等子仍以若靄襲乾隆元年明史成表進命仍兼管翰林院事二年十一月辭總理事務加拜他喇布勒哈番特命與鄂爾泰同進三等伯賜號勤宣仍以若靄襲四年加太保尋諭本朝文臣無爵至侯伯者廷玉爲例外命自兼不必令若靄襲又諭廷玉年已過七十不必向早入朝炎暑風雪無強入十一年若靄卒上以廷玉入內廷須扶掖命次子庶吉士若澄直南書房十三年以老病乞休上諭曰卿受兩朝厚恩且奉皇考遺命配享太廟豈有從祀元臣歸田終老廷玉言宋明配享諸臣亦有乞休得請者且七十懸車古今通義上曰不然易稱見幾而作非所論於國家關休戚視君臣爲一體者使七十必令懸車何以尙有八十杖朝之典武

侯鞠躬盡瘁又何爲耶廷玉又言亮受任軍旅臣幸得優游太平未可同日而語上曰是又不然皋夔龍比易地皆然旣以身任天下之重則不以艱鉅自諉亦豈得以承平自逸朕爲卿思之不獨受皇祖皇考優渥之恩不可言去即以朕十餘年眷待亦不當言去朕且不忍令卿去卿顧能辭朕去耶朕謂致仕之義必古人遭逢不偶不得已之苦衷爲人臣者設預存此心必將漠視一切泛泛如秦越年至則奉身以退誰復出力爲國家治事是不可以不辨因命舉所諭宣告朝列並允廷玉解兼管吏部廷玉自是不敢言去然廷玉實老病十四年正月命如宋文彥博十日一至都堂議事四五日一入內廷備顧問是冬廷玉乞休沐養病上命解所兼領監修總裁諸職且令軍機大臣往省廷玉言受上恩不敢言去私意願得暫歸後年上南巡當於江甯迎駕上乃許廷玉致仕命待來春冰泮舟行歸里親製詩三章以賜廷玉入謝奏言蒙世宗遺命配享太廟上年奉恩諭從祀元臣不宜歸田終老恐身後不獲更蒙大典免冠叩首乞上一言爲券上意不懌然猶爲頒手詔申世宗成命並製詩示意以明劉基

乞休後仍配享爲例次日遣子若澄入謝上以廷玉不親至遂發怒命降旨詰責軍機大臣傅恒汪由敦承旨由敦爲乞恩旨未下又次日廷玉入謝上責由敦漏言降旨切責廷臣請奪廷玉官爵罷配享上命削伯爵以大學士原銜休致仍許配享十五年二月皇長子定安親王薨方初祭廷玉即請南還上愈怒命以太廟配享諸臣名示廷玉命自審應否配享廷玉惶懼疏請罷配享治罪上用大學士九卿議罷廷玉配享仍免治罪又以四川學政編修朱荃坐罪荃爲廷玉姻家嘗薦舉上以責廷玉命盡繳歷年頒賜諸物二十年三月卒命仍遵世宗遺詔配享太廟賜祭葬諡文和乾隆三年上將臨雍視學舉古禮三老五更諮鄂爾泰及廷玉廷玉謂無足當此者撰議以爲不可行四十三年上撰三老五更說闕古說踏駁命勒碑辟雍五十年復見廷玉議以所論與上同命勒碑其次並題其後謂廷玉有此卓識乃未見及朕必遵皇考遺旨令其配享古所謂老而戒得朕以廷玉之戒爲戒且爲廷玉惜之終清世漢大臣配享太廟惟廷玉一人而已子若靄字晴嵐雍正十一年進士廷試世宗親定一甲三

名拆卷知爲廷玉子遣內侍就直廬宣諭廷玉堅辭乃改二甲一名授編修直南書房充軍機章京乾隆間屢遷至內閣學士若靄工書畫內直御府所藏令題品鑒別詣益進十一年扈上西巡感疾歸卒若澄字鏡壑乾隆十年進士改庶吉士直南書房累遷至內閣學士卒若澄亦工畫亞若靄若淳字聖泉入資授刑部主事充軍機章京再遷郎中出爲雲南澂江知府四川建昌道內擢太僕少卿五遷至侍郎歷工刑戶諸部嘉慶五年授兵部尙書調刑部七年卒贈太子少保賜祭葬諡勤恪從子若漑字樹穀雍正八年進士授兵部主事考選江西道御史擢鴻臚寺少卿六遷刑部侍郎擢左都御史上命旌卹勝朝徇節諸臣若漑請遍行採訪下大學士九卿議以爲明史外兼採各省通志專諡通諡已至千五六百人不必更行採訪若漑以老乞休上南巡屢迎謁五十年與千叟宴御書榜以賜歸又二年卒

論曰世宗初即位擢鄂爾泰於郎署不數年至總督廷玉已貳禮部內直稱旨不數年遂大拜軍機處初設職制皆廷玉所定鄂爾泰稍後委寄與相埒庶政

修舉宇內又安遂乃受遺命侑大烝可謂極心膂股肱之重矣顧以在政地久
兩家子弟賓客漸且競權勢角門戶高宗燭幾摧萌不使成朋黨之禍非二臣
之幸歟